


Ekereja Ni Mukhalelo Aya

 Eretta yoorikarika ya mwaana wira okhale vanci-enexa owuupuweliwa voosiis'ula mmavekeloni, tivo hiyo vekeekhai nintthuna wira othene niire yeeyo. Nnakhala matothoro khansuwela. Awo anivaha muthinto mmosa wa nsina, masi miyo kinoona wira awo aroopuni paahi wira evahe, awo—awo khayaasuwela yaari xeni iyo. Nave, masi Kristu onnisuwela exeni iyo. Miyo kinoowerya wohimeeryani exeni iyo, owo xetwani, ti yeeyo, xetwani. Nsina xeni awo anthhun'aya omuvaha, vano, eyo ti yawaya. Masi eyo ti yoowo, moone, erooho yootakhala. Vano nrowe, othene vamosa, emara emosa othene vano, *Waamini Paahi*, athu othene nrowe, vano.

Waamini paahi, waamini paahi,
Sothene sinniweryaneya, waamini paahi;
Waamini paahi, waamini paahi,
Sothene sinniweryaneya, paahi . . .

² Apwiya anoorowa woovonihani, murokoraka. Nrowe ninvekelele mwanamwan'ola vano okathi onuuramih'ahu miru sahu.

³ Tith'ihu a Wirimu, vekeekhai enikhala ntoko nkinwerya okumiha eyo mmuruni mwaka. Mwanamwane mwamuthiyana vale, onookhwa, owo t'ophentiwa a mutthu. Owo yoopattuxa Anyu, vano Satana onoomwiiyerya ekumi awe y'emiravo. Miyo kinvekela wira mwa Nsina na Kristu Nyuwo mukhoottiherye ntata na mookhwaani, mmuttikihe nwanani uwo. Nyuwo, Pwiya, Ole muniwerya okhaliha Ephareya Yooxeerya exiri khula epante, khwaavaha aana a Isarayeli, muhakhu Anyu, mukwaha wooromeleya eviraka mphareya ni mpakha muttethe wa natiri. Muluku, hiyo ninvekela olelo wira Nyuwo muttikiherye ottuli khula mukhoottiheryo mmuhiye mwaan'ola okhale mukumi. Ninnivaheriwa wira niveke. Nto, ntoko muluko w'athu niwaaminikini Nyuwo, hiyo ninvekela mwa Nsina na Yesu wira avonihawe mwaan'ola. Amen.

⁴ Olelo ni murima woouxukhuru miyo—miyo kinoorwa-tho wa nyuwo mwa Nsina n'Apwiya Yesu. Miyo kirwiiye owaani voohipisa paahi kikhumaka oLouisiana. Koono wira khino kaaphin'yeru va ehinaphiye Ettiminku kaamuwerya okhalana exikola ya Ettiminku. Nto vo okathi waari wootepeya oviha iwe, mpakha hiyo. . . ela yaamukhala ekukuku, wooriirya voosiis'ula woohiyana ni oLouisiana. Nyuwo khamwaarowa nnakhala okilaathi mpaani siisa muhirina ivintuwiinya soovikana emosa, oLouisiana, aamukhala ar condicionado ahiso nyuwo mwaamuhileya.

⁵ Nto vano miyo kihoorwa wira kikhhalane paahi nihiku nimosa wala manli oomumula kihinatthi okhuma vano naanaanoru, kirowaka oSaskatchewan do Norte, esumana enirwa, nto eyo osuluu iwe oPrince Albert. Iwo ottaiwene ntoko iphiro sinrowa mulaponi, wa epantte ekina. Awo aneetta iphiro sothene mulaponi woohikhala hata arampha tho, ni hat'etthu woohikhala Ahinti ni maEskimo muhina woorakamaxa hiyo onrow'ahu ekwah'ela. Tivo hiyo nookhalana atthu anci-ene anrowa okhala muthukumano yoola ankhuma mapuro othene a oCanada. Akina a awo anrowa okhuma Olimani Onikela nsuwa, awo aniira, animoorwa. Ni miyo vekeekhai kinnitthuna mavekelo anyu nyuwo mwaatthu, wira Muluku othukumane ni hiyo onivahe muthukumano muulupalexa, woowaatta, wowunnuwa wa ovuwa Wawe. Soovira miyakha mixexe wala mithanu vakisenry'aka okhala oCanada. Ni miyo kookhalana apatthani amosa amosa eekeekhai ni oonethi iwe, ari atthu ooreera murima sana.

⁶ Nto vano awo t'owiivaha sana orowa okereja. Hata wira onriirya sai, awo animwiikhuneela ni mukhumi khukilaathi vatreno, ni weettiha ekhavallo imilya miloko miraru [48 Km], wira ewerye orowa okereja. Awo animweettasa mukerekhere mwa nakhutu n'itthu sothene sikina, amiravo n'atokweene. Awo othene anoothukumana makhuru. Nto etthoko emosa enookumana n'ikina khupaceryasa weetta, erowaka. Iwo—iwo wiivahererya anirasaaya ti yeeyo eniwiiriha waakhela iparakhha sinci-ene vamutekoni w'okokhorela. Waahikhale wiivaha, khasinkhala sinci-ene wa muteko w'okokhorela. Nyuwo vekeekhai muhaana wiiveviha ni wira etthu eniwiinihani murima sana, muhaana ohiya itthu kamosa kamosa n'uhiya ovara muteko, ni wira *ela* ahiso *ele*, wira muwerye orowa okereja omoonihha Muluku wira nyuwo munnimpenta Owo, nto munimwiivaha wira murowe, ti vaavo nto nyuwo munaakhel'anyu etthu mwa yeela.

⁷ Eri ntoko an'aka. Billy Paul, miyo koono wira kaahaana. . . Miyo nkaakhenle hat'etthu okathi waary'aka mwanamwane. Amaama yaakhalanaka khino murupa mmosa wa irepusatu nto awo yaamukawa, piili wala tthaaru khula mmosa. Khino mwaha wa Natale naanaakhela nlope naamukhaani na nlaatha wala epastola yaamukhaani, wala etthu ekina. Nto miyo kaaniwoona anamwane akina ni itreno n'amucinka n'itthu, ikuwo sooreera ni ikasako sooviha. Nto miyo—miyo, eyo yaanikikhaliha oowiiniwa murima paahi, miyo kiiraka, “Miyo kakhalakhalaru kikhalanaka mwan'aka, miyo kinoowiiriha sothene sinwery'aka.” Vano, miyo kaamuthanla ovoliwa etala wira kikhhalane etthu yowaavaha an'aka. Nto okathi waakhal'aka. . . Okathi Billy waary'awe mwanamwane mwaamukhaani paahi, miyo kaahimuvaha mucinka mwaamukhaani, ni kaanimuvaha khula etthu. Nto

Meda aaniira khula etthu, oleva ikuwo sawe n'itthu, wira onvahe etthu. Masi nyuwo moosuwela etthu naapacenry'ahu wona? Miyo kaamuvanhe mucinka mwaamukhaani, munra n'inyakara, ni itthu sothene. Miyo kaamuphwanya ni e—ekhwiyeri wala ekopo, vate mukintaali, othipaka vatthu. Munnona? Miyo khwira, “Sikina khasinrowa okhala siiso.” Munnona? Nyuwo munoomuvaha mutthu itthu sothene mmatatani mwaya, awo khandthunasa. Eyo enkhala etthu mwaarin'anyu yo ohaawela!

⁸ Nto ti siiso woopowa ory'aya. Onikhala wiivaha woomalela. Eyo ti, Munna Roy. Onikhala—onikhala wiivahererya wira nyuwo muhaana khula nihiku, wira etthu wira—wira mmukhuveele Muluku ni wira etthu. Ni miyo koosuwela wira wiivaha wa nyuwo othene voosiis'ula, okilaathi mpaani mu mooviha. Ntoko sikilanthi ahu va, nrowe nihelele muupuwelo ahu Mukuttho muulupalexa atthu otonko aya ovahiwa wira yiire, owo aari Yesu Kristu okathi Owo aarummwe awe wira orwe mulaponi wira onikhwele nipuro nahu. Kahi yeeyo paahi, masi munepa Awe waahikhuruwela mookhwaani khukhala mmo mahiku mararu ni ohiyu miraru, nto mmurotonni mwaya Owo khuhihimuwa, nto vano owenle osulu, khukilaathi moonoo woolopwana wa Muluku, Wirimu, alapelaka mwaha w'olapa wahu w'elivelo Awe ni mahala Awe yawo onvaheriw'ahu.

⁹ Vano osulu o . . . osulu iwe weiwo hiyo onrow'ahu, anoorkhala atthu anci-ene, oohaawaxa, oohaawaxa, ahaana otumiha enyompe aya emosa, ipwittipwitthi saya piili wala tthaaru, wala etthu, wira ewerye orwa vamuthukumanoni. Eskimo mutokweene alakela onooruua isapala sawe vakhani wira otumihe, seiyo owo vekeekhai aathun'awe wira okhapelele ethoko awe, wira okhume. Muhinti nanakoso ohaana wira etthu emosaru. Vano, hiyo ninniweya mano waavekelele atthu awo, khandinweya? Vano hiyo ninvekela wira Muluku aavahe etthu yuulupale.

¹⁰ Vano, vaaviha, miyo nkinthuna woopisihani. Ni kintthuna wira hiyo voosiis'ula nilakiherye miyuupuwelo sahu, okathi vakhani paahi nihinatthi okhalana mavekelo aaretta, mwaha wa *Ekereja Ni Mukhalelo Aya*. Nto, vano, miyo kinoona wira mahiku vakhani avinre wira kaahivahiwa Mutthaka mmosa wa ekereja oShreveport, Louisiana, ni miyo—miyo kookupali wira ti mukhalelo wa ekereja. Nto ninrowa ohoolo wa Muluku ni yoowo voosiis'ula, nilompe ninvekele Muluku wira anikhaliherye. Muhiphavele okuxa mukhuveelelo mmosaru, masi munvekele Muluku wira anikhaliherye nihiku nla nnikhali'ahu. Ni okathi vakhani ehinatthi . . . Ola Bibilia muulupale a khalayi, masi memmo t'eniphwanyaneya ele erina Ekumi Ehinimala.

¹¹ Nto muupuwele, Masu ti Muluku, Muluku kahi etthu ekina ovikana Masu Awe. Ni hiyo khanihiyo etthu ekina ovikana moolumo ahu, ni hiyo napaka . . . Vekeekhai, vano, nyuwo ni miyo mwa muupuwelo woovirikana . . . moonelo, owanli hiyo

pooti—hiyo pooti wira, “Oh, miyo kinimwiira etthu khata,” hiyo nnihimya yeeyo mmurimani mwahu, masi pooti okhala sookhumelela hiyo vahinwery’ahu—hiyo vahinwery’ahu wira etthu yeeyo naahimmy’ahu wira naamwiira. Masi Muluku khaniira eyo, okhala wira Owo t’ohimala ni Owo onnisuwela itthu sothene, ni itthu sothene sitonko okhala, sinrowa okhala, wala . . . Tivo, Owo khanihimya nuulumo ’woohikhala wira Owo onnosuwela wira onniwerya okhaliherya.

¹² Vano Abrahamu, okathi waarin’awe miyakha emiya emosa, owo iihanne itthu iye sahaakhanle, ntoko saakhanle. Vano miyo kinihimya ela ntoko mulipiheryo w’ale anrowa ovekeleliwa, aretta. Abrahamu iihanne itthu sahaakhanle, ntoko saakhanle, ahelelaka wira Ole aamulampe natiri aamuwerya ommaliherya, wala, osuka ele Owo aahimme awe. Vano, okathi Muluku omuhimenry’awe Abrahamu, owo aryeene thanu na mosa . . . miyakha miloko mithanu na miili ni mithanu, ni Sara aryeene miloko mithanu na mosa ni mithanu, wira awo yaamurowa okhalana mwaana, vano, eyo yaari yoohiweryaneyana mara. Vano owo aahaamini yeeyo enamuwehererya mwaana, ni ahelela sintoko wira mwan’owo aari vaavale, miyakha miloko miili ni mithanu mwan’owo ohinatthi orwa. Nto Abrahamu aarina miyakha emiya okathi oyariw’awe mwana, nave Sara aarina miloko mithanu na mixexe, okhala wira aahimwaamini Owo. Vano owo iihanne itthu sihikhanle, ntoko saakhanle.

¹³ Vano, eyo ti y’aretta ni ooriipiwa murima wira evekeleliwe. Hata wira mixankiho sanyu ti sivi, vakhala wira mwa . . . eretta xeni murin’anyu, hata munihaaxeya sai, mwaamukupaliki Kristu, Masu Awe, vano nyuwo munimwihana itthu sikhanelle, ntoko sahaakhanle, vakhala wira ti soovirikana ni Masu a Muluku. Vano, Muluku ohimnye wira, “Mavekelo anvekeliwa ni wamini anoowoopola aretta.” Vano, vaari wira Muluku ohimnye yeeyo, eyo enimaliha mwaha. Vano nrowe nihele miyuupuwelo sahu, miroromelo sahu, ni wira ntoko soomala wiiriwa. Eyo yoomalihiwa okathi onikupaly’ahu.

¹⁴ Woopowa ti siiso. Hiyo nmimwaamini, okupali, waamini mmurimani mwahu, weetta ohoolo wa Muluku ni omukupali Kristu ntoko Moopoli ahu yoohi, ni omukupali Yoowo. Mwaary’ene va voosiis’ula, ni natampi, ni muhooponwe, ni mutthunaka ovonihiwa, mwaari muretta, yoopacerya mwaaphavele Apwiya. Mwaakupali Yaawo ntoko Moopoli anyu, vano erett’eyo enookhuma naanaanoru. Hata wira yaari exeni, muhelele muupuwelo anyu wothene paahi (itthu sothene sirin’anyu) mwa Mutthu oomalela, Kristu Yesu, itthu sothene sikina sinookhala sana.

¹⁵ Tivo vano muhelele muupuwelo anyu vaavo, ’etthu ehimenry’aka moolumo ala vakhani w’ale ari aretta ni ooriipiwa murima, tivo miyo kinrowa olavula voosiis’ula ni ekereja ni mukhalelo aya. Maana miyo kinoona wira onamwi ovoniha

wa Muluku oryeene wooreerexa, masi okathi waary'aka oShreveport, kaarina miteko soophiyaka miraru paahi okathi waary'aka weiwe, miraru, wala khino mixexe, omalela waatta, ohiya a mahiku muloko nnimosa. Ti yuulupalexa olaleerya minepa s'atthu ohikhanle ohela okathi munci-ene muteko w'ovoniha wa Muluku. Enamwi, atthu aryeene aretta ni oovelavela, Muluku onniwerya waavoniha. Nto eyo ennaakiheriwa mulaponi mothene, wira Owo onniira. Masi etthu yuulupalexa, vano, ti ya munepa yoowo ohinrowa okhwa. Erutthu enimookhwa. Masi munepa nnakhala khonkhwa, ni hiyo nihaana othokorerya mukhalelo yoowo nirowaka voohihererya ni Muluku.

¹⁶ Miyo imara sinci-ene kinnihimyaka ela. Miyo kintthuna itthu sothene soolikana, wira kaphiyaru omurathhini voosiis'ule, nkinthuna hata mukutakutho iwe. Kintthuna kikalane ettikitti aka mmatatani, kiwehereryaka nsina naka. Ni kintthuna kiire, ntoko Paulo a khalayi, Munna Creech, "Miyo kinimusuwela mwa owerya w'ohihimuwa Wawe." Wira Owo aihanaru eriyari y'alipa ookhwa, miyo kinookhuma... Miyo kintthuna omusuwela Owo mwa owerya w'ohihimuwa Wawe.

¹⁷ Tivo, vano, Ole okhanle Mwaneene Eliivuru, nrowe nuuramihe miru sahu ni mirima sahu wa Yoowo okathi vakhani paahi.

¹⁸ Nto, Muluku, Tith'ihu, hiyo nnoorwa wa Nyuwo vano, woovekelani wira Nyuwo munikhunlele Masu Anyu. Hiyo naamuwerya orukunxa makukhu, masi Eroho Yowarya paahi t'enwerya okhunla Masu. Vano munikhunlele Yaawo voosiis'ula, Tithi, ni munivahe mahala Anyu ootepaxa waatta. Hiyo nnoowehereryani Nyuwo. Ni wira Eroho Yowarya ekele mMasuni, ni muhimye ni iyano sa mutthu mpakha mmirimani mw'atthu, ni wira Eyo ekuxe Yaawo ehele khula murima siiso ntoko sintthun'ahu. Nto muteko waphiya okhomoni, nikhala oolikana wira nirowe owaani, hiyo nnimuuramiha miru sahu vowiiyeviha ni nnimooxukhuruni ni wottotopelani Nyuwo, mwa sothene hiyo siixuttaly'ahu sa Nyuwo ni muniirenl'anyu. Mwa Nsina na Kristu hiyo ninnivekela. Amen.

¹⁹ Osoma wa Masu, mwa Yohani Owaarya, kapitulu 1, nyuwo murina aBibilia ni mwaatthuna osoma ni miyo wala olepa vapapheloni wira ekhale yoosoma. Nto ninrowa osoma yoosoma ya Masu, nto nivekele, ni wira Eroho Yowarya ekuxe enihimy'aya mwa Masu enivahe. Hiyo nnoowerya osoma Awo, hiyo nniwerya osoma nnoosoma Awo, masi Muluku paahi t'onwerya oruha etthu enihimy'aya. Yoosoma enniweryaneyaya osommwa, 'okhala wira Awo Masu Awe, masi nto e—enihimy'aya ehaana oruuihiwa ni Muluku. Vano, mwa Yohani Owaarya, kapitulu 1, nrowe nipacerye versikulu 28 nisome mpakha 32, nave.

*Itthu iya siireiye...?...okhopela wa muro Yordani,
Yohani aapatisawe-wo.*

*...mmeeloni mwaya Yohani aahimoona Yesu
arwaaka okumana ni yoowo, khwira, Ola
Mwaapwittipwitthi a Muluku, onttipiha itampi s'atthu.*

*Vano ola ti yoole miyo kaamuhim'yaka wira, Ottuli
waka onimoorwa mutthu yoowo ori oopacerya: okhala
wira owo aahikhala miyo kihinatthi okhala.*

*Vano miyo nkaamusuwela: masi owo...wira
owo a...asuweliwe n'atthu a Isarayeli, tivo miyo
kiruul'yaka kipatisaka ni maasi.*

*...Yohani aahimukhalela onamoona, iiraka, miyo
kihoona Eroho ekhuruwaka wirimu ntoko epompa,
khweemela vasulu vawe.*

Kintthuna kisome-tho yeeyo, eversikulu iyo yookiserya,
eversikulu 32.

*Yohani aahimukhalela onamoona, iiraka, miyo
kihoona Eroho ekhuruwaka wirimu ntoko epompa,
khweemela vasulu vawe.*

²⁰ Vano Apwiya yincererye iparakha Saya mwa Masu. Miyo
kintthuna nyuwo mwiilipihe wira—wira nvare khula nuulumo
naweryaru. Munniwerya okiiwa oratta-ene ottuli iwo? Vaareera,
nyuwo munniwerya okiiwa ottuli iwo? Mwaaweryaka, nvenxe
matata. Ti yooreera.

²¹ Vano, kintthuna kilavule ni nyuwo voosiis'ula ni—ni
nlikanyiho, mwa enamuna emosa wira hata mu—mutthu
ohineetta okereja ori mu oweriye wiiwa sana. Vano, hiyo nnoorwa
okereja wira niilokihe mmansihu. Hiyo nnoorwa wira niikhalihe
atthu ooloka, aKristu ooloka, anammawaani ooloka, axitithi
ooloka, aximai ooloka, anamaitthoko ooloka. Hiyo nnoorwa
okhala wira Kristu onihimenrye wira hiyo narwaa-ru, oveka
etthu p'itthu mwa Nsina Nawe, vaavo onthukuman'ahu-vo
mpakha anli wala araru, Owo aamukhala ni hiyo ni onivaha
yeeyo. Vano, exeni yaarowa okhala tho, okhala yooreerexa
wa hiyo olelo woohikhala osuwela wira hiyo nri okereja
wira niilokihe mmansihu, wira ninnuwihe maiwelo ahu?
Akavi yaarowa wira, “Ti yeeyo kikhalenly'aka va”? Nrowe
noone. “Miyo—miyo kintthuna maiwelo oolokaxa.” Ni hiyo
khaninwerya—hiyo khaninwerya okhalana maiwelo ooloka
woohikhala wira eyo...Nto hiyo naarowaka omwiiwa sana
Muluku, ehaana okhuma mwa Masu a Muluku, okhala wira
Masu t'ile Muluku onivanhe awe wira alyihe minepa sahu
soovoliwa etala. Ni Eroho Yowarya eveleeliheriwe wira ekuxe
Masu a Muluku wira enilyihe ni Masu. Munnoona yeeyo? Moone,
hiyo...Eroho Yowarya eniveleelihiwa ekhumaka wa Muluku,
wira ekuxe Masu a Muluku ni wira enivahererye Yaawo hiyo
ntoko sintthun'ahu. Vano, miyo kinnitteeliwa murima wira

Muluku oopaka evaheryo ntoko eyo. Ankhi nyuwo? Wira Owo aamunilyiha.

²² Hiyo na ipwittipwitthi sa nikoto Nawe. Hiyo nnoorowa olavula yeeyo naanaano va, ipwittipwitthi. Vano hiyo n'athu a ipantte tthaaru a Muluku, vano Owo aaweryaka oneettiha hiyo voomalela Owo onoowerya oneettiha n'unihoolela.

²³ Vano, eyo yaahimusivela Muluku, wira okathi Owo omuveleelinhe awe Yesu elapo ya vathi, wira yaahimusivela Owo omooniherya Yoowo ntoko mwaxinama, ni mwaxinama owo aari mwaapwittipwitthi. Ottuli wopaceryani, omatta w'oEdeni, mwa miyooniheryo khalayeene s'orwa wa Yesu, Muluku aahivaha mukuttho, kiireke ahikhalana mwaapwittipwitthi wira okhale mukuttho wooranttela mwa miyooniheryo khalayeene s'orwa wa Kristu. Vano, imara sinci-ene miyo kinniikhaka mwaha xeni Muluku aarow'awe omooniherya Kristu ntoko mwaxinama, ntoko nxeni. Masi hiyo ninniphwanya wira Mwaapwittipwitthi, etthu Owo omuthanlenly'awe mwaapwittipwitthi, mwaapwittipwitthi t'omalenle okhala owiisumaaliha ni ooreera murima mwa soopattuxiwa sothene siri mulaponi. Khekhanle hat'etthu ekina eri yowiiisumaaliha ni yooreera murima onvikana mwaapwittipwitthi, oohittheka, ooiiikhaliherya mmansawe. Owo—owo kahi owiisoona. Eyo ti yoopattuxiwa yooreera murima, ni yowiiisumaaliha. Nto Muluku arowaka omooniherya Kristu molumwenkuni, Owo omoonihenrye mwa mwaapwittipwitthi.

²⁴ Vano, masi okathi Muluku, Muluku Tithi, Yehova, aarow'awe wiisooniherya Mmansawe okhuma Wirimu, Owo ooniheriwe mwa mwaapalame mmosa oomalela wiisumaaliha, ni wiiveviha wa axipalame othene anvava osulu, eyo, epompaa. Khokhanle mwaapalame oomalela ooreera murima ovikana epompa. Miyo koosoma voomalela makhalelo a axipalame ni a inama sa mutakhwani, nto epompa ti mwaapalame ootepexa otikiniha mwa khula mwaapalame mukina onivava osulu. Epompa ti yo—yo—yoophenta. Epompa ti yooreera murima. Ni epompa kherina nawamwe, eyo ti emosa mwa nikhuru n'axipalame ehirina nawamwe. Tivo nyuwo khamunoona epompa nipuro pi nipuro woohikhala vatthu vari enuku ni epyo. Vano, e . . .

²⁵ Mukalawani, yaahikhala-mo epompa. Ni epompa ennooniheriwa mapuro manci-ene mBibiliani. Eyo enthoonyerya Eroho Yowarya. Nave tho mwaapwittipwitthi onnooniheriwa mapuro manci-ene mBibiliani, ntoko Kristu, mwa Wiisuupulula, okhuma ottuli mwa Maphattuwelo, ni siiso ti epompa.

²⁶ Ni muLiivuruni mwa Maphattuwelo, epompa yaari mukalawani, ekilanthi-ene varinttani n'a—n'axipalame akina a musulu; mmosa a awo aari nakhuku, nakhuku. Nto nakhuku mmosaa w'axipalame oonanara okhanle, nakhuku ni kiyare, wona waka, anikhala ntoko axipalame oomalela onanara

nniwery'ahu waaphwanya. Nakhuku mwaapalame mmosa a ekumi yoolekela, ni owo onnikhala (awo anihimmwa wira) mwa, imara sikina, miyakha imiya piili wala tthaaru, owo nakhukuu. . . Papakaiyo onnikhala ovikana siiso.

²⁷ Masi epompa mwaxinama mmosa ahiso mwaapalame ohirina nawamwe. Vano, nakhuku aamuwerya okilaathi va n'ukhuura nikarakasa nookhwa. Khamunkhalakhala moonaka epompa vanikarakasani nenlo nookhwa. Eyo khenwerya ovilela. Wunkha waya mphulani mw'awe, eyo khiyaarowa owerya ovilela. Yaamukhaliha eretta. Iyo vekeekhai khasinwerya ovilela khula etthu nihononeya, yintaka. Iyo khasinwerya ovilela eyo, tivo eyo khenwerya olya. Vaari wira yaanilya, naanaanoru yaamwiiva epompa, okhala wira enthota yolya enikhala oyeehya wa nawamwe munipwiipwini onthota yolya. Nto aahikhale nawamwe mmo wira olakiherye ela, nto yaamwiiva epompa. Tivo nyuwo okathi wothene munoophwanya epompa eryeene vatthu vari etthu yooreera, etthu eri y'ekumi.

²⁸ Vano, nakhuku t'ovirikana. Vano, mmuwehe nakhuku okhala paahi ethoonyeryo ya namirima miili. Nakhuku onniwerya okilaathi vale vasulu—vasulu va nikarakasa nookhwa n'ulya pahi vanci-ene ntoko owo sinthun'awe, ni ovava naanaanoru arowaka mmatta olya etriku, nave. Masi epompa khenwerya olya etriku vano tho enavavela vasulu va nikarakasa nookhwa.

²⁹ Tivo, namirima miili, mutthu onniwerya okhala namirima miili n'ulya itthu sa erooho, n'itthu sooreera n'itthu soonanara. Masi muKristu eekeekhai ooyariwa vasya khanwerya ovilela itthu siri sootakhala, ni onwerya olya paahi mwa itthu sooreera. Nkawehani yeeyo! Nyuwo mwaamoonaka mutthu onrowa wiina, okhuma n'uwurya, n'ukhuma n'ukhala mutampini, otthikela okereja khino n'ukhuwela vanci-ene ntoko santu, exeni iyo? Owo namathola yolya osalani, owo onniwerya olya itthu soopiili itthu sowuntta ni itthu sooreera. Masi muKristu eekeekhai khanwerya-tho ovilela itthu iyo, okhala wira owo oovira mookhwaani khuphwanya Ekumi. Nto naanaanoru eyo yaamurowa omulamula siiso, miyuupuwelo sene sa yeeyo, mpakha saarow'aya omulamula mpakha waarow'awe orukunxa owiitho wawe n'uhuluwa. Oh, ethoonyeryo xeni!

³⁰ Vano, mwaapwittipwitthi etthu emosa yooreera murima. Owo khoniira, khonwerya wiikhaliherya mmansawe. Owo khoniiroromela mmansawe, okhala wira khonwerya wiikhaliherya mmansawe. Va okathi vakhani ovinre miyo kaavira mmalaxini okathi weettelelak'aka, nto kaahimphwanya mwaapwittipwitthi mwaamukhaani, nto sothene saaroomuhiya mwa khula enamuna, nto owo aaroovulalasa vasulu va nihuta n'arami a miywa. Nto mwaapar'owo mwaamukhaani namuhaawi aari vale, ovuuvaka ephome onlaka. Nto miyo khurwa vakhiviru nto kaahoona osulu, emilya nusu osulu

[800 m], naari nikoto nothene na ipwittipwitthi. Vano, owo aamukokhora vaavale vene ni anakhuku yaamukhala atoropolaka mmaithoni mwawe naanaanoru nahaamukuminhevo. Masi miyo voohinvulaliha mwaapar'ole, kaahimukuxa mmoononi mwaka. Owo khanakhootteke. Owo aarimwiikhaliha oomaala sana. Miyo kaahimukuxa mmoononi mwaka. Yoopacerya—emara yoopacerya, khino, mutthu aahel'awe moonoo sawe mwa yoowo, masi owo aari ooreera murima. Owo aathuna weettihiwa. Owo aathuna okhaliheriwa. Miyo kinwehererya wira munimoona eyo. Owo khaathuna weererya okhootha wala oriha munyethe, wala oluma. Amwaapwittipwitthi khanriha munyethe, awo khanlumasa; awo animwiiyeviha paahi. Nto mwaapar'ola mwaamukhaani, miyo kimukuxa kimuhela vale ni ipwittipwitthi sikina. Minutu vakhani amey'awe khumphwanya, moota aathampy'awe! Vano, moota onlattan'awe ni Mwaapwittipwitthi a Muluku!

³¹ Moosuwela, otthu atthu anrow'aya wiiva ipwittipwitthi, nyuux moosuwela exeni eneettiha ipwittipwitthi mpakha veexani wo wiiva, epurii. Masi epuri enimweettiha epwittipwitthi mpakha vatturuni v'empa eniiviwa inama, nto, vo okathi ene yoowo eyo eniwelih'aya epwittipwitthi mpakha vatturuni, vano eyo enootuphela ota. Masi, oh, atthu aniira, yaarowaka wiiva epuri, nto eyo entannya ettheke yuulupale. Munnona?

³² Nto ti siiso xetwani onrow'awe wira. Owo onimweererya oweettiha aana a Muluku mpakha mootakhalani, masi waaphiyaru okathi wa owo okhwa, owo vekeekhai ontannya ettheke yuulupale. Ti siiso xetwani siniir'awe. Ni ti siiso imara sikina, mwaaruusi mmosa owooneya oreera wala mmiravo mmosa oohilakeya, ni ekaaxa ya sikaro wala esupha ya wisghi, onimweettiherya mwaaruusi mwa sootakhala, mwaapwittitthi a munikotoni mwa mutthu, amuroihaka mwa sootakhala. "Oh, ti yooreera. Khekhanle hat'etthu nnakhala mw'etthu iyo y'osantu y'ekereja." Masi muhiye okhwa ommane mmiravo owo emara emosa, munoomwiiwa aathamasaka, akhuwelaka mulaponi mothene. Nto ti siiso xetwani siniir'awe.

³³ Masi mwaapwittipwitthi t'oreera murima, vanweryaney'awe weettihiwa. Ni tivo Muluku omooniheny'awe Kristu ntoko Mwaapwittipwitthi, nto Mwaneene ntoko Epompa. Nto nihiku Yohani omupatinsawe Yesu omuro Yordani, emosa wa itthu suulupalexa saatonko okhumelela, yaakhumelenle vaavale. Nkawehani moota ereeraly'aya! Mwaapwittipwitthi, emosa wa soopattuxiwa soomalela wiisuumaaliha s'elapo ya vathi, ni Epompa, mmosa wa axipalame owiisumaalihaxa a Musulu. Vano, eyo t'inamuna emosa paahi saarow'aya owerya okhalakhala siiwananaka. T'inamuna emosa paahi Epompa yaarow'aya okhalakhala erwaaka ommorela Mwaapwittipwitthi. Vano, okathi Epompa

ekhurunw'aya, Yohani aahimoona Yesu, nto owo khwira, "Ola Mwaapwittipwitthi a Muluku, onttipiha itampi s'atthu." Ni Yohani khwira, "Miyo koomukhalela onamoona, woona Eroho ya Muluku ntoko Epompa ekhuruwaka, emorelaka vasulu Vawe." Aleluya! Eyo eri vo. Epompa ni Mwaapwittipwitthi saahiiwanana. Owo p'ukathi Muluku ni Mutthu yaary'aya mmosaru. Owo p'ukathi Erimu ni vathi saapatikhanne aya emosa ni ekhw'aya. Aleluya! Owo p'ukathi Muluku iipank'awe erutthu, khuruuha, owo p'ukathi Muluku aakhurunwe awe mwa mukhalelo wa Eroho khwiipaka Mutthu khukhala ni hiyo. Owo p'ukathi mOvuwani mothene waapatikhanne aya emosa ni ekhw'aya. Owo p'ukathi nloko n'atthu a Adamu naamonre ni Yehova Muluku ni khula nlaikha yaarwiiy'aya vamosa, okathi Muluku ni mutthu yaakhalihw'aya mmosaru, nihiku nenlo na muupuwelo muulupale okathi Yohani omupatinsawe Yesu.

Vano, ankhwi awo yaakhalanse mwiici? Wiipa woosivela w'Epompa khiwaarowa nnakhala owerya ovilela okhala vakhiviru ni mwiici.

³⁴ Etthu xeni yooreerexa envikana wookiseryani wa makaaripi wiiwa masiya akotenle-ene vate vale ni wiipa okathi vakhani? Vamanly'aya okipweteya amwaar'aka ni mwan'aka...Miyo nkaamuhiya hata mutthu osuwela etthu kiiraaka. Kaamukela mukaaroni mwaka ya khalayi, kaamweettiha muramphani va, khurowa nno omahiye Walnut Ridge, ni weemela vale waattamela vamwirini n'uweha vamaahiye. Miyo nkaawerya waahiya. Yaakhala ntoko nkaawerya-tho ovilela. Miyo kinoona wira, mwan'aka mwaamukhaani, aryeene vale, a miyeri mithanu na miraru. Moota aavarelak'awe matat'awe makhani n'ukookolela miyo, nto miyo kaamurumiha nlope wala omuhimeerya etthu, nto owo aaniira "gugu," aanookola matat'awe makhani. Nto miyo kaamukilaathi vakhiviru va mwiri, vanci-enexa waphiyaru makaaripi. Nto yaanikhalaka epompa yaakilaathiki vale mutakhwani, eyo yaarowaka yiipaka. Oh, wulu! Emara emosa kaahiikoha sinto waari munepa ohinkhwa wa mwan'aka waatthika otthunaka olavula ni miyo. Hat'etthu yoosivela envikana wiipa w'epompa. Moota ery'aya yoophenteya! Eyo eniruuha ihapari sooreera. Moota eyo entthun'aya okhaliha murettele! Nvenye oxaka voosiisu-ene, murowe mutokorosoni waattamela iwe onkhal'aka, moota ery'aya etthu ya murettele owiriyana! Ekotenleene vasulu va miri iye suulupale soorakama, ipompa iye siipelanaka emosa n'ikhw'aya.

³⁵ Nihiku nlo, owannyawe Munna Cox, mai mmosa a epompa aahikhalana axaana anli axikhaani. Nto iyo saari osulu vasulu v'empa, tivo apaakha khayaawerya waavarasa. Nto maama ole pompa aanaalyiha. Vano aanikhuruwa ni waakuxa waaweliha mmwirini, nto awo yaanikilaathisa mme akwanyanaka ixiko

saya mmosa ni mukhw'awe, ni wiipa n'uphentana, nihiku nothene, ipompa piili, sikhani sooreera murima.

³⁶ Nto miyo kuupuwela moota Muluku, (epompa mwaapalame mmosa oophenteya) ni Epompa, Muluku, atthunaka ophentana n'atthu Awe. Muluku onthuna ophentiwa. Muluku onthuna woophentani. "Muluku oophentexa olumwenku, Owo oomuvaha Mwan'Awe mmosa-ene, wira othene ale eni emwaamini Yoowo ehipweteye, nnya ekhalane Ekumi ehinimala." Attotopeliwe Apwiya! Vano Muluku, atthunaka ophenta, Owo aahaana etthu... opaka etthu yoophenteya. Owo aahaana opaka etthu yooreera murima ntoko Yoowo mwaneene. Owo aahaana opaka etthu yaaweryaneya okhala yoophentiwa. Owo aahaana opaka etthu ya Mukhalelo Awe Yoowo mwaneene.

³⁷ Nyuwo khimwaarowa owerya ophenta etthu ehikhanle ya mukhalelo anyu. Namaphenta ohaana wiiwanana ni mphento. Iya ni mwaar'awe ahaana ophentana mmosa ni mukhw'awe, awo yaatonko ene oxintta mikattyamiho. Amusi ahaana ophentana mmosa ni mukhw'awe, awo yaatonko ene oxintta mikattyamiho. Etthu wira ephentiwe! Nyuwo munoophavela mapuro othene, omuphwanya mwali mmosa wira okhale mwaar'inyu onrow'anyu omphenta. Owo onoophavela, omuphwanya iy'awe owo aarow'awe owerya omphenta.

³⁸ Muluku onoophavela, otthunaka ophwanya munepa Owo onrow'awe ophenta. Tivo, Owo iisooniheny'awe Mmansawe mu mulaponi ntoko Epompa yooreera murima ni Mwaapwittipwitthi ooreera murima. Vaakhanle-ru wira Mwaapwittipwitthi uwo mwa minutu mmosa aamukhalakhala okuxaka mukhalelo wa mwiici oowali, Epomp'eyo yaamuvava naanaanoru, yaamwiira eronweene.

³⁹ Masi mwa—mwa—mwaapwittipwitthi, owo khorina hata muupuwelo muulupale wa yoowo mwaaneene. Mwaapwittipwitthi etthu emosa, yarimeelaru, enikhala yoorimeela voohiroromela. Epwittipwitthi khenwerya ottemula ephiro aya y'ohokolowa. Tivo epuri eneettih'aya eroihaka wookhwaani waya. Eyo khenwerya ottemula ephiro aya, epwittipwitthi erimeenle. Tivo Muluku onilattaninhe awe ni ipwittipwitthi. Hiyo narimeelaru, noorimeela. Khekhanle enamuna ya hiyo wiiphwanya mmansihu. Nto enikhala enamuna emosa paahi yowiira, eyo ti, wiiyeviha mmansihu wa Makhampusi a nikoto, nto Owo t'oneettiherya.

⁴⁰ Vano, ntoko sinimuwehaaka Mwaapwittipwitthi ula ni ipwittipwitthi vamosa...kiireke, Mwaapwittipwitthi ni Epompa, vamosa, awo anikhala mmosaru. Vano nkawehani moota Epompa yaamweettinhe aya Mwaapwittipwitthi, Mwana a Muluku. Moota Owo aary'awe ooreera murima, asuwelaka wira Owo aarowa oniiviwa inama. Moota Owo aary'awe ooreera murima, okathi wothene oheererya wiira Mmansawe, oheererya

okhala oowiisona ophiyerya mmansawe. Owo iirale, “Miyο nkinvara hat’ethu mpakha Atithi okooniha toko, ni Atithi ankhala mwa Miyο.”

⁴¹ Vano, etthu ekina mwaapwittipwitthi ery’awe, mwaapwittipwitthi onnitthuna ovahererya ihakhi sawe. Vano, Muluku onttthuna wira hiyo nikhale amwaapwittipwitthi, masi sookhala imara sinci-ene hiyo ohintthun’ahu ovahererya ihakhi sahu, opwetexa ihakhi sahu. Anci-ene a nyuwo aniira, “Ahe, miyo kihaana ihakhi, Munna Branham.” Eyo ekeekhahi, masi nyuwo munnitthuna opwetexa ihakhi sanyu? Munnitthuna ovaha ihakhi sanyu, wira Muluku oweettihekeni? Owo ti mulattu wa ikereja sahu olelo, eyaattelo yulupale, wira wiisumaaliha wa Mwaapwittipwitthi a Muluku...Entthuneya hiyo nikhale amwaapwittipwitthi, hiyo ninnikhala itthu sothene sikina ohiya amwaapwittipwitthi. Nto tivo, nimalakaru okhalana mweettelo owo, Epompa ya Eroho Yowarya enoovava khuruwa.

⁴² Vaakhanle wira Mwaapwittipwitthi a Muluku aahoopa murika woopacerya ntoko mwiici, wala wira etthu yoovirikana n’ile Epompa yooreera murima yaatthunihery’aya, Epompa yaamuvava. Eyo yaamukhuma minutu mmosa.

⁴³ Nto tivo olelo oniikoh’ahu, “Exeni eniiraneya ni ekereja Pentekosite?” Okhala wira hiyo nrookuxa mukhalelo woovirikana. Hiyo nrookuxa mukhalelo wo wira, “Hiyo ninthuna ihakhi sahu. Hiyo nnoorowa wira ele ensuwel’ahu okhala yooreera wira.” Nto hiyo nnikhala owiisoonā. Hiyo nnikhala oowali. Hiyo nnikhala oohicaliwa. Hiyo nnoohiya oviruwa onikela. Hiyo nnoohiya erala onikela.

⁴⁴ Mwaapwittipwitthi, waphiya okathi...Owo ookhalana manri awe, ari ihakhi sawe. Owo ookhalana manri awe, masi onookuxiwa mwaapwittipwitthi khiriheliwa vekwattuloni, khittthukiwa inawo sawe. Owo khanriha munyethe, owo khantannyeya. Nyuwo munookumiha ihakhi sawe mwa yoowo, okhala wira owo mwaapwittipwitthi. Owo khanwerya wira hat’ethu ekina, okhala wira owo ti mukhalelo awe. Masi muttemule ephiro ya muKristu emara emosa, nyuwo munoo suwela aari mwaapwittipwitthi wala epuri. Munoo suwela etthu ory’awe, mwamuvirikanyaru emara emosa. Nto tivo olelo ikereja sahu siry’aya ni mukhalelo iyo siry’aya.

⁴⁵ Hiyo nniisihana mmansihu mwaapwittipwitthi a Muluku. Athiyana n’alopwana, owanli aya, aapacerya wira ntoko itthu sothene masi woohikhala ntoko amwaapwittipwitthi a Muluku. Nyuwo munoo wona awo erowaka mphironi, ni kaputtula, maihi oometthiwa, mikweretho mmaiini mwaya mothene. Nto miyakha vakhani sivinre, nyuwo mwiihana...nyuwo, awo... khimwaawerya waaliva wira yiire eyo. Nto nyuwo munoo xanka mwaha wa xeni ekereja ery’aya ni mukhalelo ery’aya-mo. Okhala wira nyuwo munookuxa mukhalelo wa mwiici wala

epuri, ohiya okhalana oreera murima wo wisuumaaliha. Nto nyuwo muniira, “Owo mureerelo aka, Munna Branham.” Miyo koosuwela wira owo mureerelo anyu. “Anamamettha anoomettha maihi. Nto namamettha aametthakaru maihi, miyo nkirina ehakhi?” Eyo ekeekhahi, owo mureerelo anyu wa wAmerika. Masi munnitthuna ohiya, wira mukhale mwaapwittipwitthi? Munnitthuna wiivaha mmansinyu?

⁴⁶ Ni nyuwo athiyana, woohikhala khalayi, nyuwo mwaamurowa mphironi...Ti yootheiha oweha moota siniwar'aya athiyana olelo. Ni miyo nkinlavula mwaha wa maPrespiteriyano ni aMetotista, miyo kinlavula mwaha wa nyuwo athiyana a osantu. Munrowa mphironi, ni eyo ti . . .

⁴⁷ Miyo kaahikhalana mwiikimanyo mwaamukhaani waathomeiwe ohoolo w'ekaaro aka, nto mutthu mmosa khukiirela, wira, “Billy, moosuwela wira eyo ekhanyeryo y'Ekatolika?”

⁴⁸ Miyo khwira, “Okhuma silini aKatolika atonko aya othanla mwiikimanyo?” Khanatoko! Ola kuhiyo ekhanyeryo yo waamini w'Ekatolika; ola ekhanyeryo yo waamini w'eKristu. Waamini w'Ekatolika ti santu mwaamukhaani okhwiiye, wa Maria wala—wala mutthu okhwiiye awo animukokhorel'aya. Hiyo khinnaakokhorela athu akhwiiye. Hiyo khanimmukokhorela Cecilia Owaarya ni masantu awo othene oohiya-hiyana. Eyo Ekatolikaa, eri enamuna yuulupale y'olapela minepa. Masi mwiikimanyo onimuthoonyerya Ole okhwiiye khuhihimuwa-tho.

⁴⁹ Nto miyo khwira, “Miyo kinipweha ole mme, kiwehaka mphironi. Miyakha miloko miili ni mithanu sivinre, wala miloko miraru, okathi waahalel'aka okhala oohoona, miyo kaahimuleela Muluku wira Owo aavoninhe-ru maitho aka miyo kaarowa owehaka etthu yooloka.” Nto miyo khwira, “Khula vatthu onweh'anyu, ti wootakhala, athiyana oowara vakhani, ni athiyana oohiwar'etthu arupaathiki mmapuwani ni mapuro othene. Miyo kinweha vamwiikimanyo ohiya oweha (ni wuupuwela etthu Kristu okiireny'awe, n'urukunxa muru aka) kihiyaka itthu sikhandle sa xetwani.” Aleluya!

⁵⁰ Nto wira aakhala athu...Nkinihimya wira ti “maPrespiteriyano, aKatolika,” awo ti aPentekosite! Amen. Nyuwo muniira, “Miyo kookhalana ehakhi, Munna Branham.” Eyo ekeekhahi, masi nyuwo mwaari mwaapwittipwitthi, mwaamuhiya ihakhi sanyu. Nto nyuwo mwaarowaka mwiiraka siiso, Eroho Yowarya, Epompa yooreera murima, enoovava naanaanoru erowaka. Eyo khenrowa otakhaliwa ni nyuwo. Nnari, nnari, nnari. Nyuwo muhuupuweleke wira munoorowa wira siiso n'ukhalana Eroho Yowarya. Khivanweryaneya nyuwo wira eyo! Bibilia ohimnye siiso. Nyuwo muhaana ovaha yawinyu. . . Ahe, muniira, “Athiyana akina anniira.”

51 Ni nyuwo mulopwana, namuhaawi, itthu sikhani, soohikhala ni makhuva, alopwana-athiyana, nyuwo, munaahiya amwaar'inyu wira etthu ntoko eyo, eyo ennooniherya etthu mupakaniw'anyu. Tivo nyuwo muhirin'anyu Eroho Yowarya ntoko sinihimy'anyu wira mookhalana, weso mwaamukhalana Etthu yoophiyerya mwa nyuwo wira muwiirihe awo wira ntoko muhano okathi wothene ankhal'aya ni nyuwo, khula enamuna. Amen. Eyo eniweya ntoko enamuna ya khalayi, yoothikila. Masi ti yeeyo ekereja entthun'aya olelo, Eroho Yowarya mwa enamuna ya khalayi, enrapiha, ni waaneyya ni wuumiha, ni opasari ni efeero, ni Eroho Yowarya. Vekeekhai!

52 Mukhalelo xeni olumwenku okenl'aya-mo! Moota awo ankhumel'aya mphironi ni mweettelo aya! Moota ompharihel'anyu muru anyu vatelevisauni Namararu ohiyu, muhinarowa okereja! Moota nyuwo...Vano, masi khokhanle mwaana mmosa mulaponi...onnisuwela sothene wira David Crockett t'ani. Ni wootha iwo woonanara, yiiraka wira aahiiva ekhaya arineene miyakha miraru, nyuwo moosuwela wira etthu yowoothiwa, masi munaahiya an'inyu osariha miru saya n'ithiru iyo. Ni khekhanle hata eporsento emosa muhina w'emiya otonko osuwela etthu ya Yesu Kristu. Okhala wira olumwenku ula ori woopahuwa! Elapo ela, yoohifayi ni yoomurakamela Muluku, yookhootta Eroho Yowarya.

53 Oh, nyuwo muniira, "Miyo kinnirowa okereja n'ukhuwela." Nyuwo pooti wira eyo. Masi, mpakha Mwaapwittipwitthi ule a Muluku ooreera murima aikhalihe mmurimani mwanyu, ni ookukutthiheni makhalelo anyu ni wira ntoko mutthu oovirikana, khenrowa woophwanyihani hat'etthu nyuwo otakiha oKristu. Nyuwo muhaana okhalana Eyo. Amen.

54 Miyo kaahirowa emp'eyo va woohikhala khalayi, omuthotola mulopwana mmosa mureta, ni muhano mmosa aari vooilini, aakilaanthi vaavale. Nto khuvolowa Osvaldo uwo mwaamukhaani, atheteiye-ene ekofiya mmuruni mw'awe, khwira, "Maama, yolya yoolikana?"

55 Awo khwira, "Oophentiwa, hiyo khanaarina okathi," khwira, "voosiis'ula, wira naapeye etthu yolya y'ohiyu." Khwira, "Kinoopakelani esante," khwira, "sookhala iraranxa."

56 Owo orimweetta khikuxa eraranxa emosa, khuwehexexa, khukwenya, khurihela vaxirini vowiilipiha ntoko saawery'awe, maasi aya khumwareela vathi, khwira, "Vakhala wira eyo ti murin'anyu vapuwani va, weso miyo kinookhuma," siiso.

57 Miyo kuupuwela, "O Muluku, ole aahaana okhala awaka minutu mithanu!" Mmiravo, miyo kaamupera esapala awe ntoko sihinasuwelek'awe wira yooperiwa! Masi awo ankhalasa vale, oolemeihiwa ni ooweepesiwa. Etthu owo entthun'awe weepetthiwa sana wa enamuna ya khalayi ni nwaxuxo. Ti yeeyo ennithuna hiyo, ithhoko sa enamuna ya khalayi tho, ni

alaleyi anrowa weemela ottuli w'epulpitu n'ulaleerya Ekeekhai, n'uhela Eyo vatthu Eyo emphwanel'aya oheliwa-vo. Amen. Eyo ekeekhai. Oh, wulu!

⁵⁸ Maria mwaamukhaani ooveta nnawo nawe naamukhaani, khookolela osulu ephula ele yaamukhaani khirukunxela osulu iyano iye sikhani soopintariwa roosa (ni itthu soonanara sa Max Factor), khookola muru awe awehaka osulu khikhuma owaani. Otakhaliwa xeni! Moota anamwane anikhal'aya oohiwelela! Bibilia ohimnye wira awo yaamukhala siiso. Solempwa sihimnye wira awo yaamukhala siiso. Moota awo yaarow'aya wiiraka, moota yaarow'aya wira, ni itthu sinkhumelela molumwenkuni olelo, okhala wira awo anooriipiha murima Eroho Yowarya eroihaka ottaiwene.

⁵⁹ Miyakha vakhani sivinre. Miyo kinrowa vano, mahiku vakhani, otthapela okhuruwa woopacerya wa Eroho Yowarya waAmerika, miyakha miloko mithanu sivinre mwakh'ola, vamuthukumanoni w'Ephiro y'Azusa, muthukumano wa pentekosite oLos Angels, weiwo awo yaarin'aya okhuruwa woopacerya wa Eroho Yowarya, okathi atthu yaathukuman'aya vamosa. Okathi Kristu aakhurunw'awe eriyari y'atthu ale, awo yaari ooreera murima paahi, a murettele paahi. Awo yaarina makhalelo oowiivaha. Awo yaanitthuna ovaha. Awo yaanitthuna weettihiwa ni Eroho Yowarya. Awo khiyaacaliwa ni etthu atthu yaahimya'aya, awo yaari "a enamuna ya khalayi," hata wira yaahimmwa wira "aavahuwa" wala etthu mwaha w'ela, awo yaanitthuna weettihiwa ni Eroho Yowarya.

⁶⁰ Masi, olelo, oh, wulu, n'exiponxa y'epho ni exartela ya itthu so wiipintari, yaawanreene akaputtula, erowaka mphironi, vano, otakhaliwa! Ni wiisiihana mmansaya wira, "ari ni Eroho Yowarya." Oh, nyuwo muniira, "Masi koolavula ilavulelo." Ayo, ni xetwani onniira, nave. "Oh, miyo kookhuwela." Ni xetwani onniira, nave. Xetwani onniwerya otakiha itthu sothene Muluku sirin'awe, voohikhala ophenta, nto owo khonwerya otakiha ophenta. Ayo.

⁶¹ Vano, naanaanoru, okathi opaceny'anyu wira itthu iyo, nyuwo mupanke mikaano, khupacerya wiisakaleliha, nto ekereja khupacerya orettehasa vakhani, makhuru eriyari aya, nto ola khwira, "Moosuwela, a pastore t'owiira *lexe ni lexe*," wala "atiyakono t'owiira *lexe ni lexe*." Nto, naanaanoru, nyuwo muhiwelela yeeyo! Nto tivo hiyo nnikhalan'ahu milattu sinci-ene, okhala wira nyuwo muroopacerya omwiiwelela xetwani, n'uwiriyana mirika ohiya wiiwelela Epompa ele wooreera murima, Eroho Yowarya, Epompa ya Muluku yaarowa oweettihani, woophentani ni wooreerihani.

⁶² Mpaceryakaru okhalana iviruwelo iyo sikhani sowuukhuwa, Epompa enoovava naanaanoru erowaka. Eyo ekeekhai. Eyo

khenwerya ovilela. Mukhalelo aya ti woovirikana. Oh, Eyo khenwerya ovilela eyo nnakhala. Nto nyuwo munookhuma mmwaapaka namaithoko anyu, Eyo khenwerya ovilela eyo, Eyo vekeekhai khenrowa omaka ni yeeyo. Eyo enoovava paahi khurwa. Eyo khenwerya-tho ovilela hata vakhani. Epompa ti yooreera murima. Epompa ti yowiisumaaliha, ni Epompa, ni—ni Eyo khenwerya okhala mwa hat'etthu woohikhala wira erina mukhalelo mmosaru.

⁶³ Vano, Muluku onniwerya wookhalihani a mukhalelo woovirikana, mulopwana wala muthiyana, Owo onniwerya woovahani mukhalelo woovirikana. Nto nyuwo muniira, “Ahe, Munna Branham, niireke exeni mwaha wa yeeyo?” Mukhale-tho mwaapwittipwitthi paahi. Ari axinama anli paahi anrowa okhalakhala akhalaka vamosa, eyo epompa ni mwaapwittipwitthi. Epompa khenrweela hat'etthu ekina woohikhala mwaapwittipwitthi. Nto nyuwo mwaakhalaka epuri, vano mukumihe erooho eyo y'epuri eri mwa nyuwo. Eyo ekeekhai. Nyuwo mwaakhanleene etthu ekina, mukumihe mwa nyuwo, mwapacerya okhala ookakaruwa mwaano.

⁶⁴ Va emara emosa, miyo kaaroolaleerya voolipaxa ntoko saawery'aka olaleya epoma eyo, ni yaahikhala atthu ikonto sene iwe. Miyo kiihana waltari. Miyo koono wira kaahikhuneela mukhalelo wothene w'etampi, kaahikhuneela itthu sothene saawery'aka wuupuwela. Ohiyu ule vamanly'aya muteko, mwaaruusi mmosa owiikuxererya khirwa, owo khwira, “Ahe, Munna Branham, kooxukhuru vanci-ene nyuwo ohikihimya miyo ohiy'ula.”

Miyo kuupuwela, “Siiso aryeene muKristu eekeekhai.” Khwira, “Nyuwo khamukihimye ohiy'ula.”

⁶⁵ Miyo khwira, “Ahe, miyo kooxukhuru vanci-ene wiiwa yeeyo, muhano, siiso muryeene vakhiviru ni Omwene wa Muluku.” Vano owo khwiiniwa murima.

⁶⁶ Muhano mukina mutokweene eemenle vaavale. Miyo khwira, “Khwira, munnimusuwela muthiyan'owo?”

“Ayo.”

Miyo khwira, “Siiso oryeene muKristu eekeekhai.”

⁶⁷ Khwira, “Etthu emosa nyuwo muvonnye anyu ohimya olelo, Munna Branham, waari waapa. Owo ti mukhulupale aalipa-oowaapa mulaponi.” Nyuwo muri vo, ti yeeyo, moone.

⁶⁸ Masi nyuwo mwaphiyerya emosa emosa wa itthu iyo, hata wira mulaleyi onoochimya eyo vapulpitu wala nnari, nyuwo moonaka itthu iyo s'erutthu sa molumwenkuni, nyuwo mwaakhalakaru oohivilela seiyo, nyuwo moomurakamela Muluku, ni Eroho Yowarya enikhala ottaiwene. Tivo mithukumano khasinkhala ntoko saakhalak'aya. Tivo mphito w'ethupari ohinkhumelel'aya voosiis'ula mutapernakulu. Tivo

mithukumano suulupale sa muheemani sihinkhal'aya mulaponi, okhala wira hiyo nrooriipiha murima Epompa ya Muluku yooreera murima khurwa. Eyo ekeekhai. Eyo khenrowa okhala ni hiyo naakhalakaru oohicaliwa, naakhalakaru anafithina, "Hiyo ninthuna iphiro sahu!"

⁶⁹ Vano, miyo kintthuna wira nyuwo nwehe, Mwaapwittipwitthi aari Mwaapwittipwitthi oomaala. Bibilia ohimye wira, "Owo khaathukunle eyano Awe. Ntoko epwittipwitthi ohoolo w'alipa-oomettha, Owo aaroomaala." Owo khaathukunle ayano Awe. Owo khaari mwaapara aathuna ihakhi sawe. Nnari, mulopwana, Owo aathuna opwetexa ehakhi Awe. Owo aari Mwaapwittipwitthi oomaala.

⁷⁰ Masi, olelo, oh, wulu, moota hiyo ninthun'ahu ivirikanelo sahu! Oh, wulu! "Miyo kinimooleelani, mmuhiye mutthu akihimeerye ethu, miyo kinoorwa kamukuxe, mmiravo, kinoomukakhanyula." "Miyo kinimwaaleela anamirima miili ale kawoonaru! Nwehererye mpakha miyo kiwoone! Attotopeliwe Muluku, aleluya! Uh-huh!" Epompa enoovava erowaka. Eyo ekeekhai. Eroho Yowarya khekhanle-tho ni nyuwo, nyuwo moonakaru siiso. Mulepe eyo muliivuruni mwanyu paahi, Eyo khenkhalakhala yiiraka. Eroho Yowarya khenkhala vatthu muthinto owo wa erooho onikhal'aya-vo. Eyo ehaana okhala erooho ya mwaapwittipwitthi, erooho yoorera murima, ahiso Eyo khenkhala n'iyoyi, ti yothene eri wa yeeyo; yaahikhaleru yooreera murima, yowiisumaaliha, yoweettihiwa ni Eroho Yowarya. Nto ethu yakhumelela, Eyo hata khenweha eyo, enoorowa paahi. Munnona? Nto minutu ene yoowo eyo enrukunuw'aya, nyuwo moosuwela, eyo ti yeeyo...okathi osunse anyu.

⁷¹ Nyuwo moosuwela, etampi yoopacerya yaapacenrye mwaha wa mutthu osusa minutu mmosa paahi. Nyuwo mwaanisuwela yeeyo? Bibilia ohimye siiso. Hawa aaroosusa okathi vakhani paahi, wira aiwe ethu Satana aarin'awe wira ahimye, nto owo khumpintarela elatarato yooreera yoowo mpakha owo vekeekhai wuupuwela wira yaari Ekeekhai. Vano owo khumwiiwela.

⁷² Nto ethu emosa paahi xetwani ontthun'awe wira nyuwo mwiire, osusa paahi minutu vakhani paahi. Owo onoowerya opintari elatarato, wira, "Vano, nkawehani va. Moosuwela, munna, moosuwela, murokor'aka, awo yaari nloko n'atthu ooreerela, awo khayaarowa wira *ela*. Awo yiirale *ela* vaava va, moosuwela." Owo onniwerya woopakelani eyo vekeekhaixa mpakha eyo okhala ekeekhai. Eyo ekeekhai! Masi muupuwele, owo xetwani!

⁷³ Miyo khenkicala moota xeni awo siry'aya oonyoholiwa, vatthu xeni ary'aya yuuramelaka etampi, owo nakoso anyu waapweherya moonoo mmosa ni waavenxa n'uphenta wa Muluku. Mwaari vai nyuwo okathi Epompa ya Muluku

yoovenxaly'ayani voolokoni va mattophe? Owo nakoso anyu, mpatthani aka. Olumwenku ula onookhwa mwaha w'ophenta vakhani. E . . .

⁷⁴ Miyo kintthuna nyuwo mmuwehe mwaxinama ola, nave, mwaaxinam'ola mwaamukhaani, owo aari mwaapwittipwitthi oomaala okhala wira owo kha . . . okathi Owo aaruwaniw'awe, Owo khaaruwana atthikihaka. Owo khaananariwe ni wira itthu siiso, ni wiitannya ni wuukhuwa n'urowa, Owo khaairale eyo. Okathi mutthu . . . Okathi Owo waaruwaniw'awe, Owo khaaruwana atthikihaka. Owo khaatthukunle eyano Awe.

⁷⁵ Masi mmuhiye mutthu awiiriheni etthu nyuwo wala miyo, oh, wulu, hiyo nnimwiipelana ntoko eheneene elyaaka exumpu yootikana, nnooluwela ntoko n—nratha na mmuro ntokweene. “Miyo kinimooleelani naanaano va, awo yakinyakelaru-tho ikatha saka siisaale, miyo nkinkhalakhala kitthikelaka ekereja ele tho. Nnari, mulopwana! Attottopeliwe Muluku! Aleluya! aNasareno anookaakhela, Anawetta a oSantu, awo anookaakhela. Aleluya. Miyo nkirina-tho wira eyo.” Vaareera, Epompa enoovava.

⁷⁶ “Nyuwo moosuwela? Namirima miili uwo arowaru ekerej'ele, miyo nkinkhalakhala kirowaka-tho. Attottopeliwe Muluku, miyo nkiniira-tho!” Etthu iyo yaakelaka mwa nyuwo, mwiici uwo a mirika, Epompa enoovava. Ekeekhai. Vano Eroho Yowarya yoorowa.

⁷⁷ Vano nyuwo munooxanka exeni eniwiirani. Nyuwo munooxanka exeni eniireya ni ekereja. Nyuwo munooxanka exeni eniwiirani. Exeni ohixinttaka ntoko siirakaanyu? Nyuwo muroorukunxa mukhalelo anyu. Nyuwo murookhala epuri omuhiya mwaapwittipwitthi. Nyuwo murookhala etthu ekina omuhiya mwaapwittipwitthi.

⁷⁸ Nyuwo muhaana waakhela Eroho ele yowiisumaaliha vekeekhai, “Muhaye Eroho Yowarya ekeettiheryeke nipuro pi nipuro. Muluku, miyo kinnimpheenta khula natampi, hata wira arisa vai.” Muthinto owo wa nipuro onookela mmurimani mwa mutthu, nto nyuwo munoorowa woona etthu wiiraneya, munepa anyu.

⁷⁹ Nyuwo muniira, “Ahe, Munna Branham, yookhala enamuna yoolakiherya yeeyo?” Ayo, mukhale mwaapwittipwitthi paahi, ti yeeyo tu. Nyuwo muniira, “Ahe, Munna Branham!”

⁸⁰ Miyo kaahimukumanana mwamuthiyana mmosa ohiyu uwo, oShreveport. Billy ni miyo naakhumme nirowaka nipuro nlo wira nathume isanti vaamanly'aya muteko wookokhorela. Mwamuthiyana mmosa ooreera khurwa vale, alakela mwaaruusi, wala khino a miyakha miloko miili wala etthu ntoko siiso, oowara sana. Owo khukilaathi. Miyo kaahiweha wira owo aamuwehaweha nno ni nno siiso. Miyo kikhala kilyaaka paahi. Minutu vakhani muhano mmosa

khurwa. Owo khwira, “Ehali anyu?” Khulavula ni yoowo. Nto miyo kaanimusuwela muhano owo aari Munna Davis ohitto iwe. Nto owo ni muhano mukina a oLife Tabernacle, miyo kaanaasuwelasa sana, owo khurwa khulavula ni miyo, khurwa. Nto mwamuthiyana aakilanthi vale, owo khwira, “Munna Branham, ole waari Mutthaka wooreera ohiy’ula.”

⁸¹ Miyo khwira, “Ehali anyu, munna?” Miyo khwira, “Kooxukhuru, vanci-ene.” Nto miyo khwira, “Nyuwo muniira mpantta wa Life Tabernacle?”

⁸² Owo khwira, “Ayo kinniira.” Owo khwira, “Moosuwela, Munna Branham, miyo kaamuwerya wiipa munikhuruni n’alipa-oowiipa, masi awo anhela mikaano iwe.” Owo khwira, “Miyo kaahikhalana, oh, miyakha sinci-ene kiixuttaka olikanyiha nsu, ni itthu sothene.” Khwira, “Miyo kaaniipa meekh’aka n’itthu kamosa kamosa.” Khwira, “Masi, miyo—miyo nkaawerya wiipa, okhala wira awo aakhalana—aakhalana mikaano wira ‘khaavo muthiyana oniipintari onrowa wiipa—wiipa munikhuruni n’alipa-oowiipa.”

Miyo khwira, “Ahe, avuwihwe Muluku mwaha wa Life Tabernacle!”

⁸³ Owo khwira, “Vano, miyo kinimooleelani, Munna Branham,” owo khwira, “Miyo ka muKristu.”

⁸⁴ Miyo khwira, “Vano, munna, murowe owaani mwarapihe owiitho wanyu, wala etthu p’itthu eniir’anyu.” Miyo khwira, “Nyuwo munthuna okileela wira mwaamuhya etthu ntoko eyo y’owara etthu iyo owiitho wanyu. . .”

⁸⁵ Nto miyo kinoowerya owooniheryani wira eyo enikhuma wa xetwani. Miyo kinoowerya owooniheryani wira khiyaavo hat’etthu mu. . . Ephattu aya eyo ti y’apakawu. Nto nyuwo mwaawaraka—ru iyo, eyo ekhanyeryo ya pakawu. Vano, miyo kinoothikaru wAfrica, ni kinnikhalaka mutakhwani wa maHotentote nto kisuwela vekeekhai vatthu iprinku, vatthu sinkhum’aya itthu iyo sothene, ni yothene ela, ni maniya manci-ene oowarihiwa muxikoni mwanyu ni ni mmaaruni n’itthu sothene, othu sinkhum’aya—wo. Eyo ti y’apakawu. Ni Bibilia khonthuna wira muKristu akhale pakawu. Ni nyuwo khamunthuna. . . Miyo nkinihimya wira mwa pakawu okhala wira nyuwo muniira, masi nyuwo muniikhaliha oolikana ni yoowo. Okhala wira pastore anyu khoolenleni Ekeekhai. Bibilia ohimnye siiso.

⁸⁶ Nto vano nyuwo muniira, “Munna Branham, miyo kinoona wira kakhalana—ru maihi ookhuveya, eyo enookikhaliha ookhurunuwa murima ni itthu sothene siiso.” Eyo ekeekhai, masi mwakhalana—ru maihi oorakama munookhala ookhurunuwaxa murima. Eyo enookumiha sothene iyo muxikoni mwanyu, ni enimuupaanya n’ukhaliha sana.

⁸⁷ Vano, nyuwo munnisuwela etthu Bibilia ehimmy'awe? Wira, mulopwana ookhalana ehakhi y'omuhiya mwaar'awe n'umwalana ni yoowo vakhala wira owo onoomettha maihi awe. Owo amettha-ru maihi awe, enooniherya wira owo onkhala oohiroromelaya n'uwu. Bibilia ohimnye siiso, aKorinto Oopacerya 12, nwehe Eyo yahaakhanle ekeekhai. Muthiyana o... Muthiyana ommettha maihi awe khonttittimiha muru awe, okhanle t'iy'awe. Nto owo akhala oohittittimiha, aahaana omwalaniwa n'uhiiwa. Eyo ekeekhai. Masi, moone, pastore khanatoko wooleelani ithu iyo. Nto tivo nyuwo muniir'anyu enamuna siniir'anyu. Ni—ni mulopwana, Bibilia ohimnye wira...

⁸⁸ Va woohikhala khalayi aahikhala mutthu aalemphe epaphelo khwira, "Munna Branham, i—ipulusa iya axithiyana anthum'aya," khwira, "vano, eyo eri etthu... ti yoorika nyuwo ophwanya-tho ipulusa, nto yaamukhala etthu yooreera wa hiyo axithiyana aKristu owara ilikra iya, niiloni, wala etthu ntoko seiyo?"

⁸⁹ Miyo khwira, "Nkawehani, murokor'aka, yookhala etthu wa yeeyo. Yookhala etthu va ekeekhai. Nyuwo munoowerya wira ela: mwaahiweryeke othuma emosa, awo annitumiha maakina oottottha, nyuwo pooti oottottha epulusa." Miyo khwira, "Eyo ekeekhai. Okhaliha yoolikana ntoko..." Miyo kookupali... Moosuwela, eri mmurimani mwanyu t'enisooniherya mmansaya. Enamuna muniir'anyu ni enamuna ya mweetelo anyu, eyo ennooniherya ele eri mwa nyuwo.

⁹⁰ Tivo mirika sothene iya va ni otannyeya ni efithina, ni—ni waapa, ni evitika-vitika mukereja, ti yeeyo empwexa ekereja. Eyo enooniherya wira xetwani ookela mwa nyuwo, ni eyo enooniherya wira Eroho Yowarya ehoochiyani. Vano, miyo koosuwela wira eyo enoomupaha pirinisi aatthu amosa amosa wa nyuwo, masi yaahaana wira. Eyo yaahaana! Mwaha wa yeeyo enihimeriw'aya; kahi okhala oosuwela, kahi wira okhalana meettelo eelavilavi; masi wooleelani vatthu vari mulattu, maana nihiku nimosa kihaana orowa weemela ni waakhula mwaha wa nyuwo. Nto mwaha aya muulupale wa enamuna siniir'anyu ni meettelo anyu, eyo ennooniherya etthu mukhanly'anyu. Vaari wira nyuwo munikhalana eviruwelo ya khalayi entatha miyoono vakhani, n'ukhuma va n'ukumiha evitikavitika, wala wuulumela, wala ohifayi n'itthu siiso, eyo ennooniherya otthu onikhum'aya-wo.

⁹¹ Vano eri etthu emosa paahi yowiira, mukumihe etthu iyo ota, nto Epompa enoothikela mmurimani mwanyu. Okathi epompa yaakhumme aya mukalawani, eyo yaarimoomoliwa. Masi eyo yaahitthika khumana mukhor'ole w'ekalawa mpakha Nowe ohiya khuvolowa. [Munna Branham omanne epulpitu—Mol.] Eroho Yowarya eri vaava. Eroho Yowarya entthuna ovolowa. Tivo olelo, Eroho Yowarya, Eyo khiyoohin'yeni mahiku othene.

Eyo ekhilanthi vale paahi murinttani mwa miri nipuro nlo, yolikaneene wira evave Eneene etthikaka wira ekele mwa nyuwo, ni yoovaheni ophenta ni murettele ni ohakalala ntoko mwaakhalanak'anyu. Vekeekhai, Eyo eri vaavo. Eyo ti yoolikana wira yiire yeeyo. Eyo ennitthuna wira. Eyo enoowehererya wira yeeyo. Masi nyuwo khamunhiya Eyo wira!

⁹² Vano, miyo nkinoohimeeryani nyuwo aletto. Miyo nkinsuwela etthu pastore anyu...Miyo kinihimeerya eTapernakulu Branham. Miyo nkinoohimeeryani nyuwo atthu a ikereja sikina. Miyo kinihimeerya eTapernakulu Branham. Owo t'uri mulattu va.

⁹³ Ti yeeyo eniiriha Epompa ovava. Mmuhiye paahi mutthu opacerye etthu okereja, nto etthu yoopacerya, "Oh, ti siiso? Oh, khe...? Kahi siiso enihimy'anyu?" Naanaanoru nto Eroho Yowarya enoorowa, enoovavela ottaiwene. Eyo khenwerya ovilela erooho ntoko eyo. Mukhalelo owo wa mwaapwittipwitthi woohiyanru, nto Eroho Yowarya yoorowa. Eyo ekeekhaii. Nto owo ti mulattu olelo. Mwaha wa yeeyo atthu ary'aya mukhalelo ory'aya-mo, okhala wira awo anoohiya erooho yootakhala okela mmurimani mwaya, mmakhaleloni mwaya. Vano tivo hiyo nrin'ahu...

⁹⁴ Bibilia ohimmye wira mwaha wa yeeyo ankhala'aya aretta anci-ene ni ooripiwa murima eriyari ahu, mwaha wa itthu seiyo. Hiyo nihaana okhala ooreera murima. Hiyo nihaana okhala atthu a murettele. Hiyo nihaana okhala mwaapwittipwitthi, wira Epompa eweryeke okhala ni hiyo.

⁹⁵ Vano, muupuwele, Epompa enimoorwa. Owo ohimmye wira, "Oh, Munna Branham, muhikileele wira miyo nkinaakheleke Eroho Yowarya. Aleluya! Kikokhonreene, ohiyu iwe ohiyu umosa, oh, okathi Yaavolonw'aya, miyo kaaniwerya weetta paahi..." Vekeekhai, yaari Yeeyo! "Oh, miyo kaahoonora oreera, miyo koono ntoko kaaniwerya omukuxa khula mwaapalame mwaamukhaani mmwirini n'umupatikha n'umuphenta. Mutthu ookitakhalelaxa murima otonko okiirela etthu, kaanoona wira kaaniwerya ohela moonoo aka mwa yaawo ni waapatikha. Oh, Munna Branham, mooto koon'aka!" Vekeekhai, eyo yaari Eroho Yowarya.

⁹⁶ Masi, moone, mwaha yahaaweryel'aya Eyo okhala. Nyuwo mwaari mwaapwittipwitthi okathi ule; masi vakhanly'anyu mwiici, Eyo yaahaana ovava. Khiyaavo hat'etthu evonyen'ye n'e-n'e-n'Epompa; ti nyuwo, ni e...nyuwo muhin'ye erooho eyo orwa mwa nyuwo. "Miyo kiroohiya, Munna Branham?" Ayo, okathi oronw'anyu wiiwelela efithina ele, okathi oronw'anyu wiiwelela wotha iwe, okathi oronw'anyu mwiiraka, "Ahe, miyo kihaana ehakhi!"

⁹⁷ Nyuwo khamurina hata ehakhi! Nyuwo muroothummwa n'esisapo, eyo yaari esisapo y'Ephome yoorikexa ya Mwana

a Muluku. Nyuwo khamurina hata ihakhi vootthara ikano. Aleluya! Ehakhi emosa paahi murin'anyu, t'ila, murwe vEphattuweloni yoosareya Ephome ekumihiwe Mmutikani mwa Emanuweli, anatampi yaapwinaka moohuruwelani, annaamalela malepa aya othene oottheke. Ayo, mulopwana. Eyo t'ihakhi emosa murin'anyu, okhootta otthuna wanyu, wiivahererya wa Muluku, nto vo Muluku onimweettiherya okhuma vaavo mpakha ohoolo. Eyo t'enikhumeleliha ithu sinci-ene sootikiniha. Eroho Yowarya enoorowa nipuro nlo, Eroho Yowarya enimwiira, "Etthu iyo khelonke. Mmalihe muthukumano owo, murowe ohoolo." Miyo kinoomaliha, nave, munna, n'urowa ohoolo naanaanoru. Eyo ekeekhaii, okhala wira nyuwo muhaana weettihiwa ni Eroho ya Muluku. Nto enamuna emosa paahi yo weettihiwa ni Eroho ya Muluku, okhala ooreera murima, kahi osuwela ithu sinci-ene.

⁹⁸ "Oh," nyuwo munuupuwela wira, "Miyo kinnisuwela ithu sinci-ene." Ayo, nyuwo munikhalana muru anyu wothene ovaraka muteko nave owo khonwerya ovara muteko mekh'aya. Nyuwo munnisuwela ilivuru sothene ni sowaakhula sothene, ni Ekereku yothene ni eHeperi yothene, ni khanrina hata nipuro wira Epompa ekotele. Eyo ekeekhaii. Masi nyuwo munnisuwela yothene eyo, nto Epompa khenwerya oweettihani, 'okhala wira khamunreere osuwela.

⁹⁹ Mwaapwittipwitthi khoniihimya osuwela hat'etthu. Owo ohaana okhalana mutthu mukina wira omweettiherye. Ovuwa! Ti yeeyo. Khonsuwela hat'etthu! Amen. Etthu emosa ensuwel'aka paahi, t'ila, Kristu Yesu okhwiyé wira okoopole.

¹⁰⁰ Ohitto oCalifornia aahikhala mmiravo aarwiiye, aahikhhalana nipawe ohoolo wawe, naahimya wira, "Miyo ka namukhwanepa mwaha wa Kristu," nto ottuli waya naahimya wira, "Ankhi nyuwo mwa namukhwanepa awani?" Eyo ekeekhaii. Mukhale namukhwanepa, vamaithoni v'olumwenku, wira nwerye weettihiwa ni Eroho Yowarya, 'okhala wira aana a Muluku alopwana n'athiyana aneettihiwa ni Eroho Yowarya. aRoma 8:1, ahimye wira, "Vano khiyaavo ehukumu enaaphwanya ale ari mwa Kristu Yesu, ahineetta ettharaka ithu s'erutthu, masi s'Eroho," ahineetta ntoko mwiici, masi Epompa. Amen.

¹⁰¹ Doc aaniipaka nsipo nimosa, "Musarihe ephiro aka khula nihiku ni mphento, okathi oneettaaka ni Epompa ya Wirimu; mukihye kirowaka okathi wothene ni nsipo n'utheya, musarihe ephiro aka khula nihiku ni mphento." Nihiku xeni na murettele ninrow'aya okhala wa eTapernakulu Branham, wala ekereja t'ikereja ekina wala mutthu ti mutthu, awo yahiyaru ihakhi saya, wira ekhale mwaapwittipwitthi.

"Mulattu xeni, Munna Branham?"

102 Mutthikele omwaapwittipwitthi, mutthikele oreera murima, mutthikele ohisuwela hat'etthu, mutthikele paahi wiivahererya wa Kristu. Muheererye, muheererye osuwela hat'etthu. Mweetteke paahi voviisumaaliha, vooaala, voviiveviha, vooreera murima, nto Epompa enooweettihani. Masi khula okathi munoon'anyu. . . onrow'anyu wiiwelela waapa iwe, khula okathi onrow'anyu mukhalanaka oviruwa iwo, khula okathi onrow'anyu muupuwelaka wira mookhala ehakhi yowiira *ela* wira *ele*, Epompa enoovava paahi n'urowa. Vano nyuwo khamurina-tho Eyo. Vano, eyo khekhanle ottaiwenexa ni nyuwo voosiis'ula, ekereja. Eyo ekotenle vate vaavale vale varinttani wa murettele, ewehereryaka wira mukhalelo anyu orukunxiwe. Amen.

103 Etthu entthun'anyu olelo ovahererya ihakhi sanyu sothene, omuhiya Muluku wookilaathihani khumettha ihakhi sanyu sothene mwa nyuwo. Amen. Mwaamuwerya otthokelela moota mwaapwittipwitthi mwaamukhaani, ma—manri othene aryeene mwa yoowo? Iyo ihakhi sawe. Ayo. [Munna Branham onimutakherya mwaapwittipwitthi oovelavela iphumu—Mol.] Yaamupaheya, nto ekokhonreene vameesa vomettha. Awo annisuwela exeni eri yooreera wa yoowo. Anoomukumiha ihakhi sawe sothene n'ummettha othene, moota onthtyaw'awe ookhuruuwa-ene murima ni vowaakuwa. Wulu, wulu, owo onootthapa, n'utupha-tupha ni oniviriha okathi muulupale. Ayo, mulopwana. Nyuwo mwavaha—ru ihakhi sanyu, ti yeeyo nyuwo munaakhel'anyu. Masi nyuwo muhaana ovaha ihakhi sanyu n'uhiya Masu a Muluku woometthani olumwenku wothene mwa nyuwo, okumiha mihapo sothene sa molumwenkuni, nto nyuwo munookhala mutthu musya mwa Kristu.

104 Va okathi vakhani ovinre, wAfrika, miyo kaalavula ni—ni santu mmosa mutokweene. Owo khwira, “Munna Branham, miyo koosuwela wira nyuwo munnaamini yoovikana soopattuxiwa.”

Miyo khwira, “Vekeekhai, munn'aka.”

105 Owo khwira, “Miyakha sivinre kuupuwelaka wira kaari mutthu.” Khwira, “Miyo kuupuwela wira vekeekhai kaari muKristu.” Nto owo khwira, “Nto miyo kirowaka okereja wahu. . . Kaahaana owela mwaako, vaavo keemexak'aka ekaaro aka yaamukhaani.” Nto khwira, “Miyo kaahaana owela mwaako kirukureryaka, oh, ijarta imiyya tthaaruu wala xexe [274 m wala 365.76 m], ni kirukureryaka itakhwa n'itthu, kiwelaka.” Nto khwira, “Naanikhalanaka mithukumano sa mavekelo osulu iwe.” Nto khwira, “Miyo kuupuwela wira vekeekhai kaari muKristu.” Owo khwira, “Miyo kaanimusuwela Bibilia othene. Kaahisoma eHeperi yothene. Kaahisoma ilavulelo sothene sa Moolumo.” Nto khwira, “Khula mutthu aakirweela, miyo kaaniwerya” [Munna Branham onrumiha ikatha sawe—Mol.] “olavula n'awo siiso kimuhimyaka Bibilia.

Miyo kaanisuwela etthu kaahimy'aka." Owo khwira, "Ohiyu umosa miyo kaarowa okereja. Saahikhala ikhotto sinci-ene mukereja mwahu." Khwira, "Yaahikhala makhuru makhani-makhani nimosa niwanaka ni nikhw'aya. Nyuwo moosuwela moota ampacery'aya."

Miyo khwira, "Ayo, mulopwana."

¹⁰⁶ Owo khwira, "Kiwelelaka mwaako, miyo kaamweetta, nto naanaanoru kisuwela wira aahikhala mutthu aakitthara." Nto owo khwira, "Miyo kahuupuwela omulipelela vakhani paahi hata wira aari pani, wira akiphwanye, nto miyo kaamulavula ni yaawo okathi waarow'ahu owelelaka ephiro." Nyuwo moosuwela, eyo p'namuna y'etthu yooreera, nyuwo munoolipelela okathi vakhani. Nto khwira, "Okathi waawel'aka mwaako," khwira, "Miyo kaamuwela. Mulopwana mmosa aamuwelela mwaako," nto khwira, "Owo aahikhalana muritti mmakhatani mw'Awe waari ntoko muulupalexa onvikana Mulopwan'owo." Nto khwira, "Owo waanimutthimaka murima ni oovelavela iphumu, ni eettaka mavallo makhani paahi, atthunaka owela. Nto miyo khwira, 'Mwaapara, kookkhaliheryeni oweliha niphuta nla vamwaako?' Owo khwira, 'Nnari, Miyo kihaana oteexa nla.'" Khwira, "Miyo kiweha ntata nAwe," khwira, "Miyo kisuwela nto wira yaari yoowoona. Owo aarina mirahu mmatatani mw'Awe." Khwira, "Miyo kaahimorela vathi, nto khwira, 'Pwiya, Nyuwo mukunxe itampi sa molumwnekuni mmurupani mmo?' Owo khwira, 'Nnari, Miyo kikunxe sawinyu paahi. Kinoorohani omwaako, wira nyuwo nwerye owela paahi.'"

¹⁰⁷ Ti siiso siry'aya. Vaakhanle wira hiyo naaniwehaweha paahi, hiyo naamusuwela wira Owo onkuxa sawihu. Eyo khenookkhalihani wona wira mwa mukhani? Murim'ahu woonanara, wootakhala, okhala wira ninniweriya wira ela!

¹⁰⁸ Va okathi vakhani ovinre miyo kaamuxaya. Ntoko sinsuwel'anyu wira, miyo okisivela oxaya. Nto aahikhala mmiravo mmosa oothakala murima elapo ele, owo aari mutthu ootakhala murima. Nto owo aamukitheyaka okhala wira miyo nkawoopelaka aana eethove. Miyo khwira, "Eyo otakhala murima." Miyo khwira, "Muhinkhalelani, mulipa-ooxaya eekeekhai ni munoopela ithove suulupale ni ithu suulupale ni soolikana wira sikhwe? Muluku sinivanhe awe. Mwaahiye aximai axikhani ni ithu. . ."

¹⁰⁹ Owo khwira, "Ah, nyuwo murina murima wa mwalyakhu, mulaleyi!" Khutthikela akihimeeryaka siiso.

¹¹⁰ Miyo khwira, "Vano, nkawehani, vaakhanle wira kaahivoliwa etala nto kinamutthuna mwaana mmosa eethove, kookupali wira Muluku aamukihiya okhalana. Masi omoopela wira muthamaliwe paahi," ahe, owo aamusariha ekaro ntero. Nto owo khurwa khumwiihana, omoopela epito, n'uwu

aaniwerya wunsela epito ile n'uruma vekeekhai ntoko mwana eethove aihanaka. Nihiku nimosa hiyo naari mutakhwani owanli ahu. Miyo kimuulihaha muru, miyo khwira, "Miyo kaamuuliwa muru mmansaka." Aaniwiiva axaana a itthove athanu n'araru wala muloko emara emosa, awerya-ru, itthove n'itthu sothene, wira othamaliwe paahi, khino othikila metto s'ottuli n'uhiya ekapatte ekina eryeene vaavale. Miyo khwira, "Khivaareerela nyuwo wira siiso."

"Ah," khwira, "nyuwo alaleyi khamureere okhalana murima wa mwalyakhu!"

¹¹¹ Nihiku nimosa owo aaroosusa mutakhwani, owo aakunxe epito yeela nto owo khwinseela, nto yaarumme ntoko mwana eethove anlaka. Nto omalaka-ru wira siiso, ethove emosa yooreera khikumiherya ota muru aya, khurwa erumihaka mukhitto. Vaaniweryaneya woona maitho aya maalupale ooxeerya awehaka. Eyo yaarootuthuwa. Eyo yaamuwehaweha. Mulipa-ooxaya khuurama, khimpurula kapwitthi awe wira oopele ethhove. Ni ethhove khumoonaa mulipa-ooxaya. Masi, moosuwela, wunla iwe wa mwaaxaana eethove, owo khaamucanli kapwitthi ule. Eyo yaamuphavela mwan'ole; eyo yaari mooxankani. Moosuwela, wooniherya iwe w'omaama w'ekeekhai ni ophenta wa maama, wira eyo emuwehexexe kapwitthi ule owiitho wene, wira ekhwe, ewehaka mwaano mwa kapwitthi ule. Moosuwela, mooniheryo ole waari muulupale, eyo khirwa vakhiviru ni yoowo, owo khimurihela kapwitthi awe vathi! Owo khutthika otthyawaka khukivara moonoo, owo khwira, "Billy, mukivekelele, etthu ila yookiphiyerya!" Okathi woonne awe mooniheryo ole w'okhomaala wa maama!

¹¹² Oh, olumwenku woonaru wooniheriwa w'ophenta wa Muluku, ni omyala wa mmurimani mw'ahu w'omutthu, evirikanelo xeni enrow'aya okhala. Hiyo nahiyaru Epompa ya Muluku orwa mmurimani mwahu n'unikhaliha ooreera murima, onikhaliha owiisumaaliha.

¹¹³ Memme mutakhwani mme mwa miri ottaiwene iwe, miyo keemenleene vale kimuvekelelaka mmiravo ole, miyo kimuroiha wApwiya Yesu. Okhuma vaavale mpakha ohoolo, owo aari mulipa-ooxaya, ooreera murima ni axariya.

¹¹⁴ Vekeekhai, owo uupuwela wira aahikhalana ehakhi, owo aamwiira etthu aatthun'awe. "Iye siri vapuwani vaka, iye sinimulya alfafa aka iwe satthunaru."

¹¹⁵ Miyo khwira, "Eyo ekeekhai, masi eyo kehiyo omutthu wira siiso." Nyuwo muhaana ovaha ihakhi sanyu. O Muluku, munimorele ikharari, wira hiyo nitthune.

¹¹⁶ Va okathi mmosa ovinre, mu, oh, miyakha soophiyaka emiya sivinre, aahikhala muKristu muulupale aakhalaka epante y'okuusini Estado Unido. Nsina nawe aari Daniel Curry, mulopwana mmosa oottittimiheya, mutthu ooreera murima,

mutthu santu, muKristu eekeekhai, mutthu mmosa atthu othene yamuupuwel'aya vanci-ene, mutthu mmosa oottittimiheya. Nto ehantisi enihimya wira, owo aarimookhwa wala aarookwanyuwa, nto owo khwira. . . okhala wira owo aawenle Wirimu, vekeekhai, vakhwiw'awe. Vano vaattamenly'awe mikhora sa maluku oowaarya, mulipa-oolipelela khurwa vamukhora, khwira, "Nyuwo mw'ani?"

117 Owo khwira, "Miyo ka namalaleya ehapari, Daniel Curry, miyo kooruaha minepa s'atthu ikonto sene wa Kristu. Ni miyo ka. . . Miyo kintthuna kivolowe voosiis'ula. Mahiku aka eekumi aamala elapo ya vathi, nkirina hata nipuro n'orowa vano."

118 Ti siiso enrw'aya wa nyuwo, muhin'ye waamini. Ti siiso enrw'aya wa nyuwo muniriipiha murima Eroho Yowarya n'ukhuma erowaka ottaiwene wa nyuwo, khamuhiyo-tho ooreera murima ni ootthuneya. Soovira miyakha sinci-ene nyuwo muhinlaka. Nyuwo khamunuuliwa muru, okhuma kaahiki silini. Owara oratta-ene wothene ohookhumani. Vekeekhai. Masi eyo enoophiya vamukhora vanyu voosiisu umosa. Nto okathi Eroho Yowarya yooreera murima enrw'aya n'umana, nyuwo muhinhiyeryani paahi Eyo evolowa?

119 Vano Daniel Curry vaphin'ye awe vale va—va—vamukhora, awo khuvolowasa, khwira, "Hiyo ninrowa woona sinto mookhalana nsina nanyu mu." Awo khuwehawehasa mapuro othene, khiyaawerya ophwanya hata nsina. Khwira, "Nnari, khokhanle hata Daniel Curry mu."

120 "Oh," owo khwira, "vekeekhai!" Khwira, "Miyo ka namalaleya ehapari." Owo khwira, "Miyo kooroaha minepa s'atthu wa Kristu." Khwira, "Miyo kaaniilipiha wira kiire etthu yooreera."

121 Mulipa-oolipelela khwira, "Mulopwana, kinnikhupanyerya wohimeeryani, masi khokhanle hata Daniel Curry mu." Khwira, "Miyo kinimooleelani etthu entthuneya nyuwo wira." Khwira, "Hiyo khanrina ehakhi va y'okuxa mwaha anyu." Owo khwira, "Masi munnitthuna olapela mwaha anyu? Munooowerya olapela Veehiceni Yootteela ya Nlamulo, mwatthuna vale." Masi khwira, "Hiyo khanrina woomorelani ikharari va, nnakhala, okhala wira khanrina nyuwo mu. Khokhanle omoreliwa ikharari nyuwo." Khwira, "Munnitthuna olapela mwaha anyu?"

Owo khwira, "Mulopwana, exeni tho enwery'aka wira woohikhala olapela mwaha aka?"

122 Owo khwira, "Ahe, nto, muroweke Veehiceni Yootteela ya Nlamulo mwalapele mwaha anyu vaavo."

123 Daniel Curry khwira wira aanoona arowaka vephakani okathi woophiyaka ewora ntero. Khwira wira owo aahiphya nipuro nimosa, naakhanle noowaarexa, noowaarexa, noowaarexa, noowaarexa. Khwira, waatep'awe orowa

ottaiwene, waarya waamutepa. Waarya iwe waari imara emiya, imara ikonto wowaarexa ovikana nsuwa nihitonko aya waarya. Nto khwira wira owo aamuthukumela, athukumelaka. Nto khwira, vaphin'ye awe eriyari ya Waarya iwe, owo aahiiwa Nsu niiraka, "Nyuwo mwaari ooreera murima voomalela elapo ya vathi?" Naakhumme paahi mo—moWaaryani.

Owo khwira, "Nnari, nkaari ooreera murima voomalela," aamuthukumela.

Khwira, "Nyuwo mwaaneetta n'ixariya n'atthu othene?"

¹²⁴ Khwira, "Nnari." (Khwira, "Itthu kamosa kamosa saahirwa mmuruni mwaka mwa seiyo sahaary'aka naxariya.") Khwira, "Nnari, miyo—miyo—miyo kinoona wira nkaari naxariya."

Khwira, "Nyuwo mwaanihimya ekeekhai mwa khula mwaha, wa makhalelo anyu?"

¹²⁵ Khwira, "Nnari. Miyo kinnuupuwela itthu kamosa kamosa saahimmy'aka, sahaari soohisuweleya sana...saari soohisuweleya sana. Miyo—miyo—miyo—miyo nkinakhaleke eekeekhai voomalela."

¹²⁶ Khwira, "Vano, nyuwo mootoko okuxa etthu yahaari yawinyu, etthu p'itthu, musurukhu, etthu p'itthu ekina yahaari yawinyu?"

¹²⁷ Khwira owo uupuwela wira mulaponi aari ooreerexa murima, masi aari oottheka. Khwira, "Nnari. Nnari, miyo kaahikuxa itthu sahaari sawaka."

Owo khwira, "Vano nyuwo khamwaari oomalela." Owo khwira, "Nnari, nkaari oomalela."

¹²⁸ Khwira owo aawehererya khula minutu oruma waarowa okhuma muhina wa Waarya memmo Epompa waamumul'ayamo, "Munoohukhummwa!" Khwira, vaavo vene owo aahiiwa Nsu ottuli wawe, naari noomaaleleya ovikana nsu na maama owo ahatonko awe wiiwa. Khwira owo khirukunuwa wira owehe. Nto owiitho woosivela owo ahaatonko awe wona, woosivela ovikana owiitho wa maama, waari ohoolo wawe. Nto khwira wira Owo iirale, "Tithi, Daniel Curry aahikeemererya Miyo elapo ya vathi. Eyo ekeekhaii, owo khaari oomalela, masi owo aahikeemererya Miyo. Owo aahikeemererya Miyo elapo ya vathi, vano Miyo kinoomweererya owo Wirimu. Mukuxe itampi sawe sothene muhelele ekontha Aka."

¹²⁹ T'ani onrowa oweemereryani nyuwo nihiku nle, munna, mwamuuriipiharu murima Owo khurowa ottaiwene olelo? Miyo nkinwerya olaleya tho. Nrowe nuuramihe miru sahu.

¹³⁰ Muluku ootthuneya, Mwaapwittipwitthi ootthuneya ooluwela, owiisumaaliha, owiiyeviha, owiivaha. Axipalame yaahikhalana ipuru, akhwatte yaahikhalana mittupha, masi Nyuwo khamwaarina nipuro, nave, nlelo, Pwiya yoowo a moVuwani! Okathi Nyuwo oyariw'anyu, awo khayaarina

hata ikuwo wira yoowariheni. O Muluku, ikuwo saka sinikiphwanyihani yoorera nto? Ikaaro saka sinikiphwanyihani yooreera? Empa yooreera enikiphwanyihani? Exeni yooreera enrow'aya wira nihiku nle? Nyuwo khimwaarina apatthani; khaavo aatthuna opatthani ni Nyuwo. Khaavo aakhala ntoko otthuna woovahani ntata na mukhaliheryo. Nyuwo muhimmye wira nihiku nle Nyuwo mwaamuhimya wira, "Kaahivoliwa etala, nyuwo muhikivaha yolya. Miyo kaahithaaleliwa, nyuwo muhikivaha ekuwo." Mureerelo xeni sinrow'aya oniphwanyiha sothene iya sirin'ahu nihiku nle, Pwiya? Munihiye niweemereryeni Nyuwo, wira okathi ule waphiya ni hiyo neette Ohoolo Wawe, muwerya sothene, onikhala mapuro othene, oos-... O Muluku, hiyo naiwa Epompa eyo, ni mapupha Aya aryeene ottuli iwe muhina wa Waarya iwe wuulupale, Eyo enooverunya muhina mOvuwani mothene. Okhala wira, Nyuwo munkhala moWaaryani memmo!

¹³¹ "Okathi onrow'aka okhala oweemela mme meekh'aka, munn'aka oronweene, pastore aka oronweene, amey'aka aronweene, atithi aka aronweene, amwaar'aka aronweene, an'aka aronweene, O Muluku, kinrowa wira exeni okathi-ene yoowo, Pwiya? Kinrowa wira exeni okathi-ene yoowo? Vano eyo pooti okhala nsuwa nihinatthi otupweela ohiy'ula. Masi kinrowa wira exeni? Kiireke exeni? O Kristu, miyo kinooweemereryani Nyuwo vano! Miyo kinimwiira othanla waka olelo. Kinoohiya waalavula waka atthu akina wothene. Kinoohiya oviruwa waka wothene. Miyo kinoohiya ivirikanelo saka sothene. Miyo kinoohiya itthu sothene. Mukimethe, Pwiya, mukuxe sothene sirin'aka. Nyuwo mukikuxe paahi, Pwiya. Miyo—miyo—miyo kintthuna keemererye opuro Anyu. Miyo kintthuna kimetthiwe. Miyo kintthuna erala yothene, wiisoona wothene, ohicaliwa wothene, sothene sikumihiwe mwa miyo. Nto kintthuna oweemereryani Nyuwo, ntoko mwaapwittipwitthi oomeetthiwa, otthunaka okhotta opuha wothene awo aniihan'aya opuha wa makhalelo, wiina wothene, maira othene, ikuwo sothene soohifayi, wiipintari, ipatoo, ipirinixi sa makhope, ohicaliwa wothene nno onlikana n'ulumwenku. Nyuwo muhimmye wira, 'Muheetteke ntoko atthu a molumwenkuni. Hata muhipatthane n'atthu a molumwenkuni. Mukhume eriyari aya!' O Muluku! Mukikhaliherye, Pwiya. Mukimethe olelo. Mukikuxe ntoko mwaapwittipwitthi mukihye kikhale oomaala, kihitthukule eyano aka, kihihimye hat'etthu wa yeeyo, keemele paahi kimetthiwe."

¹³² O Muluku, evirikanelo xeni enikhala! Miyo kinnuupuwela okathi Nyuwo waatonko anyu okimetha, mwaakuxa amwaar'aka, mwan'aka, atithi aka, ni muhim'aka. Nyuwo mwaahikimetha voomalela. Nlelo, mmurimani mwaka, miyo kaanisuwela wira kaanoophentani. Moota Nyuwo onikireerih'anyu! Moota Nyuwo munikhal'anyu ooreera

murima! Sothene sikhany'aka, sothene saarow'aka oweriya okhala, sothene saarow'aka okhalakhala kikhakala; ti Nyuwo, Muluku, ti Nyuwo. Miyo kinnilapa soovonya saka, kinnilapa sothene sitonko aka wira wala wuupuwela. Mukimethe paahi, Pwiya, miyo kintthuna kikhale mwaapwittipitthi Anyu.

¹³³ Kahi yeeyo paahi, Pwiya, masi mmukuxe khula mutthu ori mu voosiis'ula, khula epwittipwitthi, n'ale othene antthuna okhala ipwittipwitthi, mwaamethe othene aya, voosiis'ula, Pwiya. Muhele metto saya sikhani vanttoroni v'Ehaphari yooreera. Wira Eroho Yowarya eweettiherye orukunxa murima naanaano va, esuwele wira awo anikhala oohicaliwa ni Muluku. Ni wira Owo ometthe ohicaliwa wothene, olumwenku wothene n'itthu sothene sa molumwenkuni. Nyuwo mmetthe sothene iyo voosiis'ula, Pwiya, wira hiyo nikhale ookhurunuwa murima ni oomaala ohoolo Wanyu, ntoko aKristu ooyariwa vasya. Munivahe, Pwiya.

¹³⁴ Miyo kinnoophentani Nyuwo. Miyo kintthuna orowa, hata wira okathi onooviha, sinto kinoothuna wala nnari. Miyo kintthuna orowa. Miyo kintthuna kiweemereryeni Nyuwo, 'okhala wira kintthuna wira Nyuwo mwaakiherye mwah'aka nihiku nle, mwiire, "Ahe, owo aahikeemererya Miyo, vano Miyo kinoomweemererya." O Muluku, munivahe olelo.

¹³⁵ Nto khula muru wuurammeene, ni khula murima wuurammeene. Kaatthuna kisuwele voosiis'ula sinto okhala paahi mutthu mu onsuwela wira nyuwo muheererya okhalana ephiro anyu mmansinyu, muhiira itthu iya sahaatthuneya wira mwiire, ni nyuwo munnoona wira voosiis'ula mwaanitthuna wira Apwiya yoomettheni paahi, ni wira, "Yookhaliheni mwaapwittipwitthi eekeekhai," munoovenxa ntata nanyu. Muluku ooreeriheni, muhano. Muluku ooreeriheni, munna. Muluku ooreeriheni, munna. Mutthu mukina oniira, "Mukimethe, Pwiya, kinoovenya. Miyo k'epwittipwitthi. Miyo nnakhala nkinthukula eyano aka, miyo kintthuna wira Nyuwo muthikile olumwenku wothene mwa miyo." Muluku ooreeriheni, munna. Muluku ooreeriheni, muhano. Muluku ooreeriheni, mwan'aka mwammiravo. Muluku ooreeriheni, muhano. Muluku ooreeriheni, murokor'aka. "Mukimethe, Pwiya." Munna Gertie...[Mulipa-onoopa epiyaano—Mol.] Nto Muluku ooreeriheni, muhano. Muluku ooreeriheni, murokor'aka. "Mukimethe naanaano, Pwiya. Miyo—miyo kintthuna wira itthu sothene sa molumwenkuni...Miyo kintthuna kiweemereryeni Nyuwo voosiis'ula. Miyo kintthuna kikhale ntoko epwittipwitthi yoometthiwa. Kintthuna wira itthu sothene sa molumwenkuni sithikiliwe mwa miyo. Miyo kintthuna kikhale Awinyu ni Nyuwo mukhale awaka. Munookaakhela Nyuwo, Pwiya, okathi onoovenxery'akani ntata naka Nyuwo?" Muluku ooreeriheni, muhano. Muluku ooreeriheni, mulopwana. Muluku ooreeriheni. Muluku

ooreeriheni, mulopwana. Muluku ooreeriheni, mulopwana. Muluku ooreeriheni, muhano. Muluku ooreeriheni, muhano, kinnoona nawinyu. Muluku ooreeriheni, munn'aka. Muluku ooreeriheni, mwamuthiyana. Ti yooreera. Muluku ooreeriheni ottuli iwo, maama. Muluku ooreeriheni, murokor'aka. Ti yeeyo, mukhale a xariya paahi. "Miyo kintthuna wira Muluku akumihe sothene mwa miyo sihikhanle paahi ntoko Yoowo, itthunelo sothene s'erala sirin'aka, khula ohicaliwa orin'aka. Miyo kintthuna wira Owo akimetthe voomalela, voosis'ula. Miyo kintthuna kikhale ntoko Yoowo. Miyo khenikicala saari ihakhi wala nnari; miyo nkirina hata ihakhi. Kirina ehakhi emosa paahi, nto eyo ti, orwa wa Yoowo. Owo onookuxa sinihaleela."

¹³⁶ Ookhala natampi mu ohinatoko omukupali Kristu, khonatoko woopowa, nto nyuwo muntthuna muupuweliwe mavekelo ala voosis'ula, mwaamuxenxa ntata nanyu, mpatthani natampi? Muluku ooreeriheni. Mukina tho munvexe ntata nanyu, mwiire, "Mukuupuwele miyo, Munna Branham. Miyo nkihiyo muKristu, ni nkinsuwela paahi okathi xeni onrow'aka okhala ookumana ni Muluku. Nto miyo—miyo kintthuna kuupuweliwe naanaano va mwa nuulumo na mavekelo, okathi ommalih'anyu." Ahe, munoovenxa ntata nanyu wira miyo koovekeleleni? Owo onnoona. Muluku ooreeriheni, mwamuthiyana. Muluku ooreriheni, muhano. Muluku ooreeriheni, mulopwana. Mutthu mukina tho, "Kintthuna kikhale, miyo kintthuna e. . ."

¹³⁷ Akavi mu ahin'ye waamini? "Oh," nyuwo muniira, "Miyo nkaarowa okupali iyo, Munna Branham." Masi, nwehe, Epompa ele ya wiisumaaliha yaakhummeene mwa nyuwo, muna, yookhala etthu evonyen'ye. Yookhala etthu evonyen'ye mwaahiweryeke-ru ovilelana mmosa ni mukhw'awe. Mwaahiweryeke-ru onlevelela khula mutthu muhina sana mwa mmurimani mwanyu, hata wira yinre exeni wala ahimnye exeni, mwaahiweryeke-ru waalevelela muhina, Yesu ohimnye wira, "Mwaahaaleveleleke akhw'inyu sootheka saya, mmurimani mwanyu, nave Atith'inyu ari Wirimu khaanolevelelani."

¹³⁸ Vano, ankhii, okathi ula wooviha, ankhii olelo Muluku aarowa owiihanani? Ekhanleene Ephattuwele yoothukuliwa, ekereja yoolikana, Eroho Yowarya ekotenleene vapathoni v'emp'ela, yoolikaneene wira ekhuruwe etthikele mmurimani mwanyu yookhaliheni ooreera murima ni a murettele. "Kiireke exeni, Munna Branham?" Mukhale mwaapwittipwitthi paahi. Eroho Yowarya enookhuruwa naanaanoru mwakhalaru mwaapwittipwitthi. Masi mwakhalana-ru itthunelo soovonyeya, muu—muupuwelo woovonyeya, mwaatthunaka okhalana ephiro anyu mmansinyu, ni muhinathuna ohiya, vano Eroho Yowarya khenkhalakhala erw'aka.

¹³⁹ Vano ni miru sahu sowuurama, kaatthuna kisuwele sinto ookhala wa nyuwo muvenxale matata anyu. . . Vano, Yesu

ohimnye wira, “Ole oniiwa Masu Aka ni onimwaamini Ole okirumme, onookhalana Ekumi ehinimala, khanrowa ohukhummwa masi oovira mookhwaani khuphwanya Ekumi,” Yohani Owarya 5:24. Masi vano mwaatthunaka orwa waltari, okokhora wenno, nrowe othene nivekele mpakha moonelo ole w’oreera murima, wa murettele nyuwo mutonko anyu okhalana, wala mwaatthun’anyu wira mukhalane, wira orwetho wa nyuwo. Nirineene miru sahu soowuurama, niipaka, “Yookhala Ephattuvelo yoosareya Ephome,” kintthuna wira murwe, mukokhore ni nvekele. Atthu othene vano antthuna orwa, mukokhore nno ohoolo waltari mwiire nvekelaka.

Yookhala Ephattuvelo yoosareya Ephome,
 Enikumihwa Mmutikani mw’Emanuweli,
 Nto anatampi apwinne mohuruwelani. . .
 (Muluku ooreeriheni, muhano, murwe
 naanaano mukokhore)
 Annaapweteya. . .

¹⁴⁰ Ni miru sanyu sowuurama, siiso kinroromel’aka wira mookhala mmurimani mwanu. Nyuwo moosuwela wira onikhoottiha orwa munvireloni voosiis’ula, mwaahaana wuuliwa muru mmansinyu? Muthiyana ooweela, etthu yoohaawa, ikosa soowiipa, maihi oottweelela, onthara ephiro arw’aka waltari.

¹⁴¹ Va okathi vakhani ovinre, mulopwana mmosa ooweela aarimopowa, okathi wa ipottha. Owo aaroorowa, nto okhala wira aahoopowa, owo khimuhimeerya mukhulupale awe wira owo aahitaphuwa. Owo khwira, “Nyuwo muri exeni?”

Khwira, “Miyo kootaphuwa.” Vano owo khimukhaliha ootaphuwa.

¹⁴² Va nnoorwa nikhuru nikina n’atthu ninkhuruwa wira noopowe voosiis’ula. (Khuhimya wira owo aahitaphuwa.) Atthu othene evekeleke, nto nvekele vanci-ene mwaatthuna vale, Eroho Yowarya elavulaka n’atthu aniira ethanlelo.

Owo khwira, “Mose, nyuwo munihimya wira mootaphuwa?” Khwira, “Ayo, mulopwana, mukhulupale. Kootaphuwa.”

¹⁴³ Khwira, “Mwaari ootaphuwa, nto miyo kinimookhalihani ootaphuwa, nave. Murowe mwalaleye Ehapari yooreera.”

¹⁴⁴ Okathi waary’awe oolikana wira okhwe, anci-ene w’axinn’awe akunya khuvolowa wira emoone, nto okathi awo avolonw’aya, owo khwira, yooniwa wira aarootupa. Okathi ovennye awe, owo khwira, “Miyo kooni wira kaahirowa.” (Muluku ooreeriheni, munn’aka, mukokhore paahi, vo.) Khwira, “Miyo kooni wira kaahimala orowa.”

Khwiiriwa, “Monneni, Mose?”

¹⁴⁵ Owo khwira, “Vaphin’ye aka vamukhora, kaahimooni Yoowo.” Khwira, “Miyo kaarimweemela, kinamuweha Yoowo.”

Nto khwira, “Naahikhala Nlaikha naaruule khwira, ‘Rwani, Mose. Nyuwo moolaleya Ehapari yoorera, miyakha sinci-ene, mookhalana ekuwo ni nleha sinoolipelelani.’” Owo khwira, “Muhikileele itthu sa ekuwo ni nleha. Miyo nkinthuna ekuwo ni nleha. Miyo kintthuna onweha Yoowo paahi.” Miyo kinoona wira eyo t’itthunelo ya khula muKristu.

¹⁴⁶ Va okathi vakhani ovinre, okhuma oChicago, miyo kaari mukolisewu, kiireke, musewu, nto kaamuwehaweha sothene mpaani mme. Kaahimoona mulipa Ooripa mmosa mutokweene, mukerekhere mwaamukhaani mootteela mwa maihi mmuruni mwawe, muttikiyeyaka vale, ni ekofiyo awe mmatatani mwawe. Miyo kaamuweha yoowo. Owo aawehaweha nipuro nimosa naamukhaani, vano owo khituphela ottuli, nto maithori khupacerya omorela mmalakuni mw’awe oowuuluvala ni ooriipa. Owo khupacerya ovekela. Miyo kimuweha okathi vakhani. Owo khuwehaweha-tho, khupacery-tho wunla. Miyo kimurowela khwira, “Mulopwana.”

Owo khwira, “Ayo, mpatthani mukunya?”

Miyo khwira, “Miyo kinimoona wira nyuwo mwa . . . Exeni yootannyaleni siiso? Mutannyen’ye mwaha wa xeni?”

¹⁴⁷ Owo khwira, “Mulopwana, vaakhanle wira mwaaniwerya wona sinoon’aka makatha aka, miyo kookhalana makuma mmakhatani mwaka.” Khwira, “Miyo kootoko okhala epottha.” Owo khwira, “Evitirina ela yaamukhaani va, ele ekuwo emphwanyaneyana mme.”

Miyo khwira, “Miyo kinnoona wira ele ekuwoo, masi exeni ekhalanxe y’omeekh’aya mwa yeeyo?”

¹⁴⁸ Owo khwira, “Nlepa nle vaavale,” khwira, “ele ephomee ya Abraham Lincoln.” Khwira, “Ephome ele t’ekuminhe nrapala n’epottha mwa miyo.” Owo khwira, “Vano, mukunya, eyo khayaarowa wootannyani, nave?”

¹⁴⁹ Miyo kihela miyoono saka muxikoni mwawe, miyo khwira, “Muluku ooreeriheni, munna. Miyo kinnisuwela Ephome ekina enikitannya miyo.”

Owo khwira, “Miyo koosuwela Ephome ene yeeyo, nave, mwenye.”

¹⁵⁰ Miyo khwira, “Owo ookumiha nrapala n’epottha mwa miyo.” Okathi uwo miyo kaanikhuma Ttiminku n’uxinttana mootthyawani n’urowa, n’ulavula iperwa soonanara. Nto, O Muluku, kiirale sai etthu ila? Nlelo sookhala mirahu muhina mmurimani mwaka otthu wiiraly’aka yeeyo. Masi miyo kinnitteeliwa murima okhala wira Owo ookumiha nrapala mwa miyo. Eyo yothene yoorowa vano, Owo ookhala nipuro naka.

¹⁵¹ Va okathi vakhani ovinre, kimuwehaka muthiyana mmosa, n’uwo aari ootakhala miyo waatthunaaka omulamula. Muluku khukivaha yoowoona. Miyo khimuvekelela nto, maana

kaarimoona wira itampi saka saari suulupale ntoko sawawe. Nto miyo kaaheetta mpakha vaavale kikilaathi kimwaattamela yoowo kimuulihaha muru, kimuleela wira miyo kaari mulaleyi. Axipatthani awe anli alopwana...Owo aarina miyakha soophiyaka miloko mithanu na mosa ni mithanu wala miloko mithanu na miili, axipatthani awe anli alopwana khukokhora vaavale, nto awo othene khuvahererya murim'aya wa Kristu. Oh, wulu, evirikanelo xeni!

¹⁵² Nyuwo khamunthhuna? Nyuwo murimwiira itampi vanci-ene tu, voosiis'ula, murookhalana murim'anyu wooriipa ni woottakatta mpakha Eroho Yowarya ehinwery'aya okwannya? Khino Epompa eroovava Mahiku othene, Eyo eroorowa khuluwuru.

¹⁵³ Muluku ooreeriheni, oophentiwa. Mwanamwane mmosa mwamuthiyana onoorwa. Muluku ooreeriheni, oophentiwa. Nyuwo muniira, "Mwanamwane ole khansuwela." Oh, ayo, owo onnisuwela. Owo khasomme irevista sinci-ene ni ihantisi sa mphento ntoko nyuwo othene sisomme anyu. Owo ti mulattu, owo mwaamukhaani. Yesu ohimnye wira, "Mwaahiye anamwane erweeke wa Miyo."

¹⁵⁴ Mutthu mukina tho aatthuna orwa, wiitakanxa voosiis'ula? Altari t'ootthukuliwa. Okathi mukina paahi, vano hiyo niipaka tho, nto ninrowa ovahererya nivekelo okathi anatampi ala oowiiniwa murima anvekel'aya.

Nawiiye ooluwela aahitthapa woona
Ephattuwelo ele mu...(Veekkhai, itthu
sothene saahimala, mwaapar'ole oohaawa
aahiphiya woomaleloni.)
Nto vale khino miyo, ootakhala ntoko
yoowo...

¹⁵⁵ Nyuwo khamunthhuna orwa naanaano? Nyuwo khamunthhuna orwa, nyuwo munsuwela oratta-ene? Bibilia ohimnye wira, "Nyuwo mwaasuwelaka wira yooreera, nave muhinaira, wa nyuwo eyo yoovikana wira etampi." Khamunthhuna orwa? Nyuwo moosuwela wira moovonya. Mutthare ephiro murwe mukokhore waltari, ni mmuleele Muluku wira nyuwo mooriipiwa murima mwaha wa moota munimweettel'anyu Yoowo. Muhiye Eroho Yowarya etthike ni yookhaliheni owiisumaaliha ni ooreera murima ni oomaala tho. Khamunthhuna? Muupuwele, nyuwo mwakhwa vale, Owo okhummeene mwa nyuwo, khonkhala-tho mutthu wira aakiherye mwaha anyu. Owo onthhuna wira nyuwo mmweemererye Owo voosiis'ula. Muluku ooreeriheni, munn'aka.

¹⁵⁶ Kinoowehererya. Ti yeela, muloko n'athanu paahi mukereja t'anoona veekkhai okhala oottheaka? Nyuwo munnikhala makhalelo a murettele, owiisumaaliha, ooreera murima,

oomaaleleya? Vano, ela eneettiheriwa ni Eroho Yowarya. Nyuwo munoolevelela, khamurina awanani? Mukhalaka makhalelo a khalayi, vasulu voolamuliwa nno w'anatampi? Nyuwo khamunkhala ntoko apakawu, munikhala voovirikana? Makhalelo anyu othene arina ethharihelo voovirikana? Eroho Yowarya yooreera murima ekilanthi veehicieni va murim'anyu, yookhalihakani makhalelo a mureettele ni oomaaleleya ni oophenta, eriyari y'atthu othene? Anamaitthoko anyu n'atthu othene annisuwela, ni othene onipatthan'anyu annisuwela, wira nyuwo mwa muKristu ooreera murima, oomaala, owiisumaaliha, owiiveviha? Epompa ya Muluku eri ni nyuwo? Mookupali? Ola pooti okhala okathi anyu wookiserya. Vaareera.

¹⁵⁷ Vano wa nyuwo nno waltari, Muluku ooreeriheni. Nyuwo khamurina y'olamuliwa vano. Eroho Yowarya yooruaha nlamulo wa nyuwo. Ni nyuwo khamutthunne ovarela ihakhi sanyu, mwiiraka, "Oh, miyo kookhala muKristu okathi munci-ene woophiyerya. Khenkitthuna orowa." Amosa amosa a nyuwo, emara anyu yoopacerya yootoko okhala waltari. "Miyo pooti okhala natampi katthuna vale, iyo ihakhi saka." Ayo, eyo ekeekhai. Nyuwo mwa mutthu ootaphuwa a nlamulo, nyuwo munooowerya wira khula enamuna entthun'anyu. Masi nyuwo moovaha ihakhi sanyu voosiis'ula. Muniira, "Atthu anrowa ohimya exeni, miyo ohimya oKristu vano nto orowa waltari, atthu yarowa ohimya exeni?" Masi Muluku onihimya exeni? Owo ohimye wira nyuwo murwe, nto nyuwo khurwa. Vano nyuwo moovaha ihakhi sanyu, nyuwo muhoorwa wira mukhalane Eroho Yowarya yooreera murima wira ekuxe opuro Aya mmurimani mw'anyu olelo. Miyo koosuwela wira Owo onimwiira. Koosuwela wira Owo onimwiira. Owo aahimye wira onimwiira. Vale, Eyo paahi khenwerya ohiya, khenwerya ohiya orwa. Owo onoovekela, wunla, okhwela, n'itthu sothene sikina, etthunaka nipuro n'orwa-vo, etthunaka orwa wa nyuwo.

¹⁵⁸ Nto okathi anyu w'okhwa, nlaikha nle na mookhwaani nakilaathi-ru vamettoni v'olili, ohiya olipelela vale etthu yootakhala, ni osuwela wira nyuwo mwaahikhootta orwa emara emosa, nto munepa anyu khukhala wooriipa ni woottakatta, kiwaavo-tho okathi, hata wira muninla mwiilipihaka moota xeni. Esawu aahiira etampi awe ya mahala . . . nihiku nawe na mahala, kiireke, ni khaarina okathi. Owo aahinla vooriihiha-vo murima, otthunaka ophwanya nipuro wira olakiherye, masi owo khaawenrye. Muluku aamwiihanne emara yookiserya.

¹⁵⁹ Masi nyuwo muvahe ihakhi sanyu sothene n'axipatthan'inu othene, ni miyoonelo sanyu sothene n'itthu sothene, voosiis'ula, wira murwe nno. Nyuwo moovaha ihakhi sanyu, wira mukokhore va mulavule ni Muluku. Miyo kinimooleelani mwa Masu a Apwiya, wira Kristu ohimye wira, "Ole onrwa wa Miyo, hata mano Miyo nkimmurihela ota." Vano muryeene vaavo

waltari, murukunxe murima, mmuleele Yoowo wira nyuwo munniriipiwa murima mwaha wo wira itthu siiraly'anyu.

¹⁶⁰ Owo t'ori mulattu atthu ahinaakhel'aya Eroho Yowarya yapatisiwa-ru, atthu khanrukunxa murima voomalela. Muluku onthuna waavaha Eroho Yowarya. Owo onthuna wira nyuwo mukhale owiisumaaliha ni ooreera murima ni oomaala. Tivo nyuwo muniveny'anyu ni erala ene yeeyo mmurimani mwanyu. Oh, khino nyuwo munvenya, mukhuwelaka, mulavulaka ilavulelo, wala etthu ekina, eyo khiyaarowa wookhalihani okhalana Eroho Yowarya. Nyuwo muhaana ovenya vale mutthu mukina. Nyuwo muhaana ovenya vale, ooreera murima, oomaala ni owiisumaaliha, owiiveviha, ni Eroho ya Muluku ekhalaka ni nyuwo. Mwaahiyu, nwehe ottuli mphito moone erakamelo xeni nyuwo mweettaly'anyu, moone wira nyuwo muniphwanya ettima okathi wothene. Eyo Erohoo Yowarya. Eroho Yowarya ophentaa, ohakalala, murettele, ovilela, wiisumaaliha, oreera murima, ovilela, waamini. Vano, murukunxe murima paahi mmuleele Muluku wira nyuwo muntthuna yeeyo naanaano va. Owo ti . . . Owo onimwiira.

¹⁶¹ Mwanamwane mwamuthiyana, nyuwo vo, oophentiwa, mwiire etthu yeeyo. Mureerihwe. Amai inyu yeemenle ni matata mwa nyuwo.

¹⁶² Munna ola mutokweene ni ooweela va, uuramme waltari. Alakela nyuwo mwaahaana okhuura mukatthe wa nakhuwo ni nakhuwo oothitiwa khwaapeiwa, khino mwaahana okhala nipuro noophunyeya, mwa sothene sinсуwel'aka, munna. Muluku oreerihe murim'anyu, yookhala empa yuulupale mutthokiheriw'anyu mOvuwani voosiis'ula. Vekeekhai.

¹⁶³ Kiniweha waltari vathi n'umoona muhano mmosa, opacenrye ottweelela maihi, mwamuthiyana ni muru awe wowuurama, muthiyana a maihi ootteela owaatta. O Muluku! Kinimoona mulopwana mmosa akokhoraka, anci-ene ari nno. Murukunxe murima paahi, mmuleele Yoowo wira mooriipiwa murima. Mmuleele Yoowo wira nyuwo khamuniira-tho. Ni mahala Awe, nyuwo munoohiya paahi ivirikanelo sanyu sothene omalihiwa, okhuma olelo mpakha ohoolo. Nyuwo muntthuna okhala ooreera murima ni oomaala. Nyuwo muntthuna okhala oowiiyeviha n'urowa otthu Owo oniweettihery'aweni.

¹⁶⁴ Atthu yaahimyaka etthu, hata wira enikhala ntoko yooreera, nyuwo munoorowa ohiya ihakhi sanyu y'omwaapa namaithoko anyu. Nyuwo munrowa olavula, nyuwo munrowa omulavula Yesu. Nyuwo munrowa wira paahi itthu siri sooreera. Nyuwo khamunrowa okhuma ntoko namwiiva. Nyuwo khamunrowa okhuma wira mwaatuphele ale oohittheke etthu. Masi nyuwo munoona eyirelo eyo yoominyala y'okhomaala wa aKristu eekeekhai, ni nyuwo muntthuna okhala ntoko yaawo. Khamunrowa othuna omuleela hata mutthu wira nyuwo

mwa muKristu, mwaaryeene yoowo, athu animoona paahi ni anoosuwela mwaalavulaka. Nyuwo munthittiwa muhina ni ota.

¹⁶⁵ Vano, muyevihaka murim'anyu, murukunxe murima vano. Mmuleele Muluku, wira nyuwo "muhiiniwa murima," nyuwo "khamuniira-tho," nyuwo "muhuuliwa muru" mmansinyu, enamuna mwiiraly'anyu. Nto vo miyo kinrowa woovekelelani. Ni kookupali, naanaanoru nto, murettele onookhala vamurimani vanyu, murettele paahi ntoko muro onimoorwa okhuruwelaka mmunepani mwanyu. Enamwi nyuwo muhikhuwelaka, enamwi nyuwo muhilavulaka ilavulelo, enamwi nyuwo muhituphaka osulu ni vathi; masi nyuwo munookhuma waltari murineene Etthu mwa nyuwo, Etthu mwa nyuwo enrowa wookweettyihani vamwiikimanyo woolipa okathi wothene onrow'anyu okhalaka. Vano nvekele, ntoko sinvekel'aka. Mulape.

¹⁶⁶ Tith'ihu a Wirimu. Athu oohiphwanela, mpaani mu mooviha, mooviheriha voosiis'ula, nivuku noovihiha; masi, Muluku, Nyuwo mookumiha oviheriwa nno wa hiyo. Eroho Yowarya yookhuruwa, khiwaaminiha athu wira awo yaahivonya. Awo yiira etampi. Irooho saya saari sowiittotopa. Awo yaari oowali, oowaapa, oosuwelexa, ehithhunaka orukunxa murima, ehithhunaka waalevelela athu awiirenele itthu sowaatthekela. Awo khayaatthuna, masi olelo Eroho Yowarya khikuxa Masu a Muluku, khilukamiha Yaawo mmirimani mw'aya sooreera, ni khwira, "Vano nyuwo munnitthuna otthikela vatthu vaary'anyu emara yoopacerya mwaarwiiy'anyu waltari, otthikela vatthu athu othene, nyuwo munaaphent'anyu athu othene, ni munikiphent'anyu Miyo n'uphenta ohinkhwa? Nto nvenye murwe waltari." Awo ahiira eyo, Pwiya.

¹⁶⁷ Vano, miyo kinvekela vano wira Nyuwo mureerihe miyuupuwelo saya, Pwiya, mureerihe mirima saya, mwaakhalihe ooreera murima ni a murettele. Wira awo evenye valtari va vano, vamanly'aya orukunxa murima, evahereryaka makhalelo aya wa Nyuwo, etthikele owannyaya. Hata wira enkhumelela exeni, aiy'aya yakhala othene oonanariwa, wala amwaar'aya onanariwa, wala anamaitthoko onanariwa, wala mutthu onivaran'anyu muteko wala opatthana, "Miyo kinookhala ooreera murima paahi ntoko epompa."

¹⁶⁸ Numala sothene, Wunla wanyu ikuhu ti Wawinyu, "Miyo kinoothuvela, anihimya t'Apwiya." Moota hiyo oniphwanyaahu wira ti siiso, Pwiya. Mukhale oomaala paahi, mukhale ooreera murima, mmoone Muluku okuxa... okhala vekeekhai mwaapwittipwitthi Awe. Vekeekhai, ekhweeli-khweli. Makhampusi ula ooreera murima onnivaha Ekumi Awe mwaha wa awo, Owo onookhuruwela ipwittipwitthi Sawe. Ni Owo onimweettiha seiyo. Ootakhaliwa ole onvirikanya seiyo! Ootakhaliwa ole onihimya nuulumo nimosa ovirikanya seiyo! Ohimmye wira, "Vaamureerela otthukweleliwa nxilo

muxikoni mwanyu, khuriheliwa eriyari y'ephareya. Malaikha aya voohihiyererya annoona ekhove y'Atithi Aka ari Wirimu." Munnona? O Muluku, hiyo ninthuna. . . "Eniwiirel'anyu awo, munikiirela Yoomi."

¹⁶⁹ Vano, Muluku, miyo kintthuna kikhale ooreera murima. Kiniipweha waltari, nave, voosiis'ula; kahi voosiis'ula, masi khula voosiisu ni khula nihiku. Kintthuna kikhale oomaala ni ooreera murima, ni ntoko Yesu. Munivahe, Tithi. Munikhaliherye wira hiyo nikhale siiso vano, muhiye mawimpi oohitokoseya a mphepto ekhuneele munepa ahu.

Murettele! Murettele! Murettele wooreerexa,
Onikhuma w'Atithi osulu; (Khamunoono
Yoowo vano mmurimani mwahu?)
. . . varoohoni vaka mahiku othene, (Aleluya
Aleluya!) . . .
Murettele! Murettele! Wooreerexa . . .

¹⁷⁰ Munna Gertie ohimnye wira kihimeerye ekereja yothene wira owo t'olamuliwa, nave, masi oniirihia epiyaano okhala alatari awe. Okhuma waltari, epiyaano t'altari awe, ohimnye wira, "Muhimeerye ekereja ekivekelele," okilanthi-ene vale maithori emoraka mulumetani mwawe. Epulpitu ila t'altari aka. Miyo koorukunxa murima, nave, Bibilia aka t'onaana. O Muluku!

Murettele, murettele wa Muluku!
Onikhuma w'Atithi osulu; (Oh, aleluya!)
. . . varoohoni vaka mahiku othene . . .

¹⁷¹ Muluku, vakhala wira koomutthekela mutthu, kihootthekelani Nyuwo, mukumihe, Pwiya. Mukumihe etampi mukereja mwaka yaamukhaani, voosiis'ula.

¹⁷² Akavi anwerya woona paahi wira Muluku ohoolelevelani, ni wira Epompa ya Murettele yookilaathi-tho vamurimani vanyu? Eyo yoovava etthikaka naanaano, yoovenya erowaka nipuro Naya. Eroho Yowarya erimweetta etthikaka khwira, "Mwan'Aka, Miyo kinnitthuna woophentani okathi wothene. Nyuwo paahi kamwaakihya Miyo wira siiso. Miyo nkinwerya okhala n'irooho anyu y'erala ya khalayi. Masi vano nyuwo muvaherery'anyu, Miyo kootthikela mmurimani mwanyu voosiis'ula." Akavi anoona siiso? Nvenxe ntata nanyu. Nvenxe ntata nanyu, ti yeeyo, waltari wothene. Oh, eyo ti yooreera. Akavi a muthukumano wa vate anoona siiso? Nvenxe ntata nanyu. Oh! [Munna Branham onimuleela mulipa-onoopa epiyaano, "Okhala Ntoko Yesu."—Mol.]

¹⁷³ Tith'ihu a Wirimu, hiyo ninnooxukhuruni Nyuwo mwaha w'okathi ula wo wiivahererya, wooloka, ntoko okuxa masa mmatatani, onyaanyasa, onyakattasa, mpakha okhala oosiva, oosivexa mpakha mwana mwaamukhaani aarow'awe okilaathi n'ukhuura. Ti siiso hiyo ninthun'ahu mirima sahu, Pwiya.

Mukuxe seiyo mmatatani Mwanyu ookhalana mirahu sa ipereku, munyakatte paahi, mwiiraka, “Mwana, khamunoono wira munookiiniha murima Miyo? Nyuwo mwakiiniha murima Miyo okathi otthyanwe anyu mmatatani siisaale. Nyuwo mwaakiiniha murima Miyo, oh, murima Aka waakhuma ephome mwaha wa nyuwo, mwana, okathi woowenh’akani mwiiraka itthu *khata-khata*. Masi vano okhalanne aka murima anyu mmatatani Mwaka, Miyo kintthuna kikhalihe wowiisumaaliha sana. Miyo kintthuna kikhalihe wira Miyo kiwerye orumeela n’ukhala memmo. Miyo kintthuna kivavele varinttani voosiis’ula, Miyo kintthuna kivave kitthike ni kikhaleke, kikhalihe empa Aka ni nyuwo.” Munivahe, Muluku. Hiyo ninnoophentani Nyuwo. Munivahe, wa ovuwa Wanyu. Hiyo ninvekela mwa Nsina na Yesu.

Okhala ntoko Yesu, o... (Nyuwo khonoosivelani pahi okokhorela siisa? Oh, munepa aka onoorapa paahi.)

Elapo ya vathi miyo... (Omoona Owo okhuruwa mwaa—mwa alipa-ookokhorela siisa, murima anyu onoona oreerera vekeekhai? Murima aka onootthimaka paahi.)

...mukwaha okhuma vathi mpakha mOvuwani

Miyo kinvekela paahi okhala ntoko Yoowo.

Mwaamovenxa ntata nanyu okathi oniip’ahu yeeyo?

Okhala ntoko Yesu, o... .

(Joe, munnitthuna orwa ovekela voosiis’ula, munna? Muluku ooreeriheni. Muphwanye opuro waltari nno, Munna Joe. Muluku ooreeriheni.)

...mukwaha okhuma vathi mpakha mOvuwani

Miyo kinvekela paahi okhala ntoko Yoowo.

¹⁷⁴ Koosuwela wira onooviha, mpatthani. Koosuwela wira onooviha. Masi miyo—miyo kinroromela wira nyuwo munoono ntoko sinoon’aka. Oh, miyo kinoona ntoko wira kaahaana ovava paahi. Moota Owo ory’awe oophenteya! Exeni kaarow’aka owerya wira? Vatthu xeni kaarow’aka orowa? O Muluku! Kinrowa wowi? Kineettiheriwa wowi? Exeni enrowa o—enrowa okhala exeni? Kinrowa okhala vai okhuma va mpakha miyakha emiya? Ankhi kahaarina Yoowo? Ti vai, ti vai vari ntthyawelo nikina?

Okhuma nikhoma n’oPeteleheemu ooyariwa Mmalapo,

Mulaponi miyo kinwehererya okhala ntoko Yoowo;

Makhalelo othene eekumi okhuma vathi
mpakha mOvuwani
Miyu kinvekela paahi okhala ntoko Yoowo.

Othene ahu vano.

Okhala ntoko Yesu... (Oottotopeliwa okhale
Muluku! Ayo, Pwiya! Ayo, Pwiya! Kahi
olumwenku; ntoko Nyuwo!)
... okhala ntoko Yoowo;
Makhalelo othene eekumi okhuma vathi
mpakha mOvuwani
Miyu kinvekela paahi...?...

¹⁷⁵ Murineene miru sanyu sowuurama, kinrowa woovekelani
etthu emosa. Ookhala mutthu mu ohinsiveliha Eroho Yowarya.
Ookhala mutthu onihaniwa. Miyu kinlavula mwa Nsina na
Pwiya Yesu, ntoko profeta Awe. Miyu kinniwerya woona murima
Awe wiiniwa. Ota iwe, ookhala mutthu ohimwiiwelenle Yoowo,
aahaana wira orwiiye ene. Khamunrwa naanaano?

Makhalelo othene okhuma... (Ayo, munna,
masi aakhala tho woohiyani nyuwo)...
mOvuwani
Miyu kinvekela paahi okhala ntoko Yoowo.

Okhala ntoko Yesu paahi... (Eyo ti yothene
enthun'aka, owiisumaaliha ni owiivaha,
owiiyeviha, okhala ntoko Yoowo.)
Mulaponi miyo... (Khamunthuna orwa
naanaano? Muluku onthuna owooneni
nyuwo weetta, aakhala anci-ene a nyuwo.)
Othene okhuma... .

¹⁷⁶ Miyu kaahisuwela wira mwaamoorwa. Muluku ooreeriheni.
Muluku ooreeriheni. Muluku ooreeriheni. Ti yeeyo. Ti yeeyo.
Miyu kaahiweha mapuro othene muthukuman'ola, nto eruku
yootepexa oriipa yahaatonko aka woona yiithomeiyeene vale.
Eroho Yowarya eri vaava vano. Eri mwa miyo naanaano va.
"Eriipihaka murima Eroho Yowarya."

Okhala ntoko Yesu... .

¹⁷⁷ Exeni Owo iiraly'awe? Aarowaka otthu Atithi
yaamurum'aya. Muluku ooreeriheni, munna. Muluku
ooreeriheni, munn'aka. Ti yeeyo, murwe mukokhore.

Mulaponi miyo kinwehererya... .

¹⁷⁸ Vano ola okathi w'olapa wa enamuna ya khalayi,
wiisookoolela oratta-ene, wiiithokiha. Murwe. Nlelo kinoona
wira aakhala akina mme. Muluku ooreeriheni, muhano. Muluku
ooreeriheni, muhano. Muluku ooreeriheni. Muluku ooreeriheni.
Muluku ooreeriheni. Ti yeeyo. Eroho Yowarya t'erina exariya
okathi wothene. Murwe. Ti yeeyo, mweette murowaka.

...Yoowo.

Okhala ntoko Yesu, okhala ntoko, ayo, Yesu, Mulaponi miyo... (Oh, wulu, ti yeeyo! Eyo t'inamuna, musarye munvireloni paahi, mweette nvekele.)

Makhalelo othene eekumi okhuma vathi mpakha mOvuwani, (Murukunxe murima paahi, mmuleele Muluku wira mooriipiwa murima, eyo ti yothene murin'anyu wira.)

...okhala ntoko Yoowo.

¹⁷⁹ Munnitthuna otthikela murw'aka vano? "O..." Ti yeeyo, mwaakuveke paahi voohovelela, murwe. "Okhala ntoko..."

¹⁸⁰ Munrowa wira exeni? T'ani onrowa oweemereryani, khino ohiy'ula? T'ani onrowa oweemereryani okathi okhwa onrow'aya owela miyoono sanyu? Hata wira mwinre exeni, Eroho Yowarya ekilanthi vaavo vakhiviru ni nyuwo. Ti Yoowo otthunaka wira murwe.

Makhalelo othene okhuma vathi mpakha mOvuwani

¹⁸¹ Murukunxe murima paahi, mwiire, "Muluku, mukilevelele. Miyo—miyo nkaalakenle wira eyo. Nyuwo khamunrowa okeemererya miyo kaahiweemereryeni Nyuwo vano. Nto miyo kintthuna Nyuwo mukeemererye, ni miyo kiniweemereryani Nyuwo okhuma olelo mpakha ohoolo. Kinrowa okhalaka ntoko entthuney'aya muKristu okhala. Kinrowa orukunuwa iphiro saka. Kinrowa okhala ooreera murima ni oomaala. Kinrowa waahiya atthu othene ohimya sintthun'aya, itthu sothene. Kinrowa okhala paahi owiisumaaliha ni oomaala ohoolo Wanyu." Hata wira okathi xeni munihim'yanyu wira mwa muKristu, ekereja xeni eniir'anyu mpantta, eyo kherina nata n'iyu. Murwe naanaano. Muluku ooreeriheni. Mweette murowaka vate, mwaana.

¹⁸² Muluku onlavula ni nyuwo vano. Vakhala wira munnaamini wira miyo ka murumeyi Awe, Eroho Yowarya yoolavula ni miyo voosiis'ula, yiraka, "Mwiihane, aakhala anci-ene vathi vale." Nla ti nihiku, ola p'ukathi. Aakhala-tho oophiyaka athanu wala athanu na mosa wala oovikana ottuli iwe, vekeekhai vaatthuneya wira erwe naanaano. Muupuwele, munna, murokor'aka, miyo kinoowehexaxani yeenyu, kinnoona iruku iye sooriipela siithomeiyeene vasulu vanyu. Vanreerela murwe naanaano.

¹⁸³ Okhala ntoko Yesu! Khamuntthuna okhala ntoko Yoowo, ooreera murima, oomaala, owiisumaaliha, owiiveyiha? Muluku ooreeriheni, mmiravo. Muluku ooreeriheni, paapa muri ni mwana. Muluku ooreeriheni, murokor'aka. Muluku ooreeriheni, mpatthani natampi. Ti yeeyo. Murwe mwaakuvaka,

murokor'aka, mukhume mwaakuve, muphwanye opuro paahi. Muluku ooreeriheni.

¹⁸⁴ Murokor'aka kinoophenta'akani, nyuwo khamureerane itthu wira muxukhurele. Murupanthi voolilini, muluwelaka, va nyuwo muneetta murw'aka, waltari. Muluku oreerihe murim'anyu woosivela.

¹⁸⁵ Eroho Yowarya enoolavula-tho vano. Orukunxa murima, mmuvekele Muluku paahi okathi ula, nvekele nivekelo nanyu paahi. Ti nyuwo mwiirale etampi, vano ti nyuwo munvekela. Mmuleele Muluku wira mooripiwa murima wira siiraly'anyu. Muhimuxikhe hata vakhani mutthu ori vakhiviru ni nyuwo. Mwiire paahi, "Muluku, mukilevelele, miyo nkaalakenle okhala siisaale. Miyo kintthuna kikhale ooreera murima. Miyo—miyo nkikhalakhala-tho kivirikanyaka n'utannyeya."

¹⁸⁶ O Muluku, oh, moota enikisivel'aya! Tithi a Wirimu, khula mutthu oolapha ori waltari vano, ekhunaka makutha aya, evekelaka! O Muluku, wira aximai, axitithi, anamwane, axitithi, aximai, atthu akina, anamaitthoko, atthu a mukereja, matiyakono, maatinistratore, O Muluku, okathi ula w'opakiwa wa enamuna ya khalayi, nikilanthi-ene mpaani mu mooviha voosiis'ula, Eroho Yowarya ekhuruwaka, elavulaka murettele. O Muluku, miyo kintthuna keemele nihiku nle wira kiwiiweni Nyuwo mwiiraka, vooreera-vo murima, "Ayo, nyuwo mwaahiwela mukeemererya Miyo, vano Miyo kinooweemereryani." Miyo kintthuna wira Nyuwo muhele murettel'owo mwa khula murima ori va olole, Muluku. Voomaaleleya ni vooreera-vo murima, miyo kintthuna Nyuwo mwiire. Kintthuna wira Nyuwo mweette mmo ni moonelo mmosa ohinkhalakhala-tho waahiyaka, okhuma nihiku nla mpakha ohoolo. Wira itthoko sikhale isya. Wira atthu ekhale atthu asya. Itthu sothene sikhale isya olole, okhala wira atthu ala ahiiyeviha mmansaya. Nyuwo muhimmye wira, "Atthu aniihaniwa ni Nsina Naka yayiyeviha-ru mmansaya, n'uvekela, nto Miyo kinimwiiwa Wirimu." Nto miyo koosuwela wira Nyuwo munimwiiwa, voosiis'ula, Muluku.

¹⁸⁷ Ni kinvekela nlevelole w'ale ahanle ekilanthi-ene mukhaterani mwaya, yaatthuneya wira erwe. Muluku, mulavule ni yaawo, wira awo ehikhalane-tho murettele mulaponi mpakha yiire ethanlelo yeeyo, Pwiya, orwa ni okhalihwiwa sana ni Nyuwo. Munivahe, Pwiya. Mmureerihe khula mmosa vano. Oreera Wanyu murima ni ikharari Sanyu sikhale mwa khula munepa ori woottharuwa ni wuuramme mukereja mu voosiis'ula.

¹⁸⁸ Tithi, Muluku, miyo kiirale ela n'ukiruma Wanyu. Miyo koowiihana atthu ala; awo aavenya. Nyuwo muhimmye wira, "Ole onrowa okikhalela onamoona Miyo ohoolo w'atthu, Miyo kinoomukhalela onamoona ohoolo w'Atithi Aka ni Malaikha oowaarya." Anci-ene a ala mu aKristuu mwa

miyakha sinci-ene, masi awo aavenya voosiis'ula wira ehimye wira itampi saya wira ahiira itthu soovonyeya. Awo aakhala oohiphenteya. Eroho Yowarya yaahikhuma mwa yaawo. Ni imara sinci-ene awo khankhalana moonelo ole wooreera murima, woosivela, wowiisumaaliha waatthuneya wira yoneke. Anciene a awo anatampii aruule emara yoopacerya. Masi, Tithi, awo antthuna moonelo ole wooreerexa, murettele onvikana muupuwelo wothene. Mwaavahe yoowo awo nihiku nla, Pwiya Muluku, ni wira othene aya ekhale oophenteya ni oosareya Eroho Anyu, yaakhumaka nipuro nla olelo, erowaka mmawanny'aya moohiya-hiyana, ekhalane makhalelo makina ni ekhale atthu akina. Hiyo ninvekela yeela mwa Nsina na Kristu.

¹⁸⁹ “Nipuro vEphattuweloni.” Vaareera, nyuwo muri waltari, nvenye, mwaaphavele Apwiya Muluku, murukunuwe ni muvahane mukhono n'atthu othene ari vakhiviru ni nyuwo. Oh, ninrowa wiipa, atthu othene vano, nivenyaka okathi vakhani paahi ohinatthi opacerya muteko woovoniha.

Nipuro, nipuro, ayo, nookhala nipuro,
 Nookhala nipuro vEphattuweloni wa nyuwo;
 Nipuro, nipuro, ayo, nookhala nipuro,
 Nookhala nipuro vEphattuweloni wa nyuwo.
 (Atthu othene!)

. . . nipuro, ayo, nookhala nipuro,
 Nookhala nipuro vEphattuweloni wa nyuwo;
 Nipuro, nipuro, ayo, nookhala nipuro,
 Nookhala nipuro vEphattuweloni wa nyuwo.

Nipuro, nipuro, ayo, nookhala nipuro!
 [Nipuro vahiitthu mufiitani—Mol.]

¹⁹⁰ Waamini! Nyuwo moosuwela nihiku nimosa, munna, okathi awinyu—amwaar'inyu yaalikanry'aya, wira nvekeleliwe? Naanaanoru kaaronwe okatthi, nto Eroho Yowarya khukiirela, “Muhoove.” Amen. Owo khohiyo eekeekhai? Ooreerexa! Ahe, attottopeliwe Apwiya! Miyo kinnoona ntoko wiipa mwaha w'oxintta! Vaareera.

Nto Ephome Awe ennirapiha vootteelihexa . . .
 (Mookhalana etthu y'ohimya?)
 Yesu onnoopola! . . . ? . . .

¹⁹¹ Vaareera, Munna Neville vano. Ni Munna Slaughter ookhalana etthu y'ohimya.

[Munna Slaughter onoolavula. Nipuro vahiitthu mufiitani—Mol.]

[Munna Neville oniira, “Wulu! Avuwihawe Apwiya! Amen! Attottopeliwe Muluku! Kookupali wira atthu othene ahaakhela voosiis'ula.”] Ovuwa! Aleluya! Aleluya! [Munna Neville onoolavula, numala owo oniira, “Muupuwele miteko ohiy'ula, nookhala muteko w'orapiha inawo ni wa ekomunyawu.”] Owo

onimukoha Munna Branham, “Moosuwela sinto munookhala-vo?”] Alakela kinookhala vaava ohiy’ula, nave. Ayo, ntoko sinsuwel’aka, miyo kinookhala vaava vaahikhale wira kinimwiihaniwa nipuro nno.



EKEREJA NI MUKHALELO AYA EMK56-0805
(The Church And Its Condition)

ETTHARANELO YA IKEREJA

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yettaka 5 mweri wa Agosto, 1956, oBranham Tabernacle oJeffersonville, Indiana, w'Amerika, okuxiwe wookaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2019 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org